

萬有文庫

第二集七百種

王雲五主編

明詩紀事

(三十)

田 疇 輯

商務印書館發行

明詩紀事

(三十)

陳田輯

國學基本叢書

天有文而雲霞變色。地有絡而川岳殊形。五色同適於目。而藻績異施。八音同傾於耳。而絲竹別器。文章派別。極意營構。模範無越。性靈自淪。故雅趣風情。騷懷賦心。體有不同。并臻於妙。若夫城中高髻。里婦捧心。下士趨風。有識避走。無他。識曲者聽其真。逐迹者難爲巧也。有明詩流。吳下擅於青邱。越中倡於犂眉。八閩工於膳部。東粵盛於西庵。西江妙於子高。各有軌轍。不相沿襲。自茶陵崛起。籠罩才俊。然當時倡和。襲其體者。不過門生執友十數輩而已。暨前後七子出。趨塵躡景。萬喙一聲。其間獨照之匠。若荆川。遵巖。震川。變秦漢爲歐曾。易詰屈。誓牙爲字。順文從。允矣君子。展也大成。已至升菴子業諸公。藻豔擷乎齊梁。簡質得自魏晉。冲淡趨於陶韋。沈雅參之杜韓。滅竈再炊。異軍特起。余於戊集。採輯十數名家。直取胸情。劃絕畦町。冀與海內詞客。共究斯旨也。光緒戊申仲夏。黔靈山樵陳田。

# 明詩紀事戊籤目

## 卷一

楊慎五十九首

## 卷二

高叔嗣三十四首

## 卷三

薛蕙三十八首

## 卷四

華察二十二首

## 卷五

皇甫冲八首

皇甫汈三十五首

## 卷六

王廷陳三十三首

楊巍三十二首

皇甫孝四十九首

皇甫濂九首

顧銳二十四首

齊之鸞十首

李濂二十六首

卷七

許宗魯三十二首

黃佐三十一首

張時徹二十六首

卷八

張含十一首

張合一首

金大車四首

金大輿三首

馮惟健一首

馮惟重二首

馮惟敏七首

馮惟訥七首

栗應麟三首

栗應宏八首

侯一元二首

侯一磨一首

何良俊二首

何良傅一首

王昺一首

王杲一首

卷九

李開先二首 嘉靖八才子

唐順之八首

趙時春一首

熊過一首

卷十

鄧黻一首

吳益夫一首

呂柟一首

戴大賓一首

戴冠五首

唐龍五首

周金二首

歐陽鐸一首

王慎中十三首

陳束七首

任瀚四首

呂高一首

汪本一首

周允中一首

景暘一首

方豪三首

胡纘宗二首

毛伯溫二首

王應鵬二首

徐文華一首

夏良勝一首

程啓充一首

王大用一首

陸伸一首

胡德一首

卷十一

鄒守益三首

林文俊二首

柴奇三首

王以旂一首

王道一首

汪文盛一首

游璉一首

汪必東一首

陸震一首

盧煦一首

顧可適一首

丁奉五首

顧彥夫一首

夏尙樸四首

常倫四首

張璧一首

許成名二首

屠僑三首

王思二首

趙德剛一首

周廷用三首

孫繼芳一首

周敘一首

南大吉一首

胡佩一首

王濬一首

鄒頤賢二首

卷十二

唐皋一首

劉天民六首

馬明衡一首

劉儲秀一首

簡霄一首

翟瓚一首

林炫二首

范輅一首

朱鳴陽一首

陸倬一首

盧雍一首

袁達十三首

張紵七首

蔡昂二首

蔣山卿十二首

林大輅一首

顧瓌三首

吳鎧一首

彭大治一首

桑溥一首



顧可久一首

陳能一首

雷應龍一首

陳器一首

戴欽二首

霍韜一首

田汝棟一首

吉梁二首

卷十三

舒芬一首

崔桐一首

張經三首

顏木五首

王謳十三首

錢憲一首

范永鑾一首

金賁亨一首

林春澤一首

張治道二首

左國璣二首

董穀二首

陳文學一首

倫以訓一首

張岳一首

夏言十八首

馬汝驥五首

汪應軫二首

王鳳靈二首

楊士雲七首

朱豹一首

戴鰲一首

陳文沛一首

林希元一首

李鶴鳴三首

曹嘉一首

葉桂章一首

徐哲一首

張鉉一首

卷十四

陸鈇十首

楊麒一首

鄭洛書一首

許相卿六首

郭波一首

胡侍一首

汪佃一首

李士允一首

王漸遠一首

江暉一首

彭簪一首

方邦望二首

張治十首

敖英十二首

張袞三首

張鳳翀一首

王同祖二首

吳廷翰四首

何棟一首

李默一首

童承敘二首

倫以諒一首

廖道南一首

周祚三首

謝蕢一首

楊言一首

任瀉一首

吳檄一首

田頊一首

陳大濩一首

王洙一首

蔣泮一首

鄭一鵬二首

洪珠一首

吳文之二首

王璜一首

陳講一首

朱子和一首

邵經邦一首

胡森一首

趙兌一首

彭汝寔一首

浦瑾一首

王汝礪一首

李松一首

祝時泰一首

卷十五

王教一首

潘恩二首

朱廷立二首

李仁十首

陸銓一首

柯維騏四首

馮世雍二首

馬坤一首

盧襄一首

林汝永一首

陳東一首

錢文爵一首

徐階六首

鄭曉三首

屠大山一首

李舜臣二首

顧夢圭四首

李新芳一首

劉隅一首

朱瀚四首

王激二首

黃直一首

鄭弼一首

葉良佩一首

王度一首

吳鵬一首

徐獻忠一首

孟思五首

卷十六

龔用卿一首

蘇祐八首

陸瑯一首

屠應峻四首

陸粲四首

林雲同一首

方一蘭一首

黃禎一首

金克厚一首

陳表一首

毛衢一首

錢楞一首

劉陽一首

袁表十五首

張整一首

張子立一首

王格二首

江以達一首

翁萬達三首

李元陽三首

田汝成四首

聞人銓一首

岑萬一首

王宣一首

陳仲錄一首

李學詩一首

高遠一首

孫宜五首

鄧遷一首

卷十七

羅洪先十一首

胡松四首

楊博一首

崔廷槐七首

樊鵬二首

范言一首

郭鳳儀一首

祝文冕一首

谷繼宗一首

張鐸一首

于玘一首

顧聞一首

程文德三首

蔡雲程一首

鄭大同一首

鄭綱一首

楊祐一首

楊本仁八首

崔涯一首

陳節之一首

馮彬一首

周顯宗一首

張選一首

程烈一首

林垠二首

黃中一首

劉成穆三首

黃省曾□首

林恕四首

吳子孝十首

沈愷四首

陳子文一首

胡經一首

趙鯤一首

蔡黓一首

王表一首

史元中一首

唐鉞一首

強仕三首

許炳八首

孔天胤四首

尹耕六首

許應元十一首

蔡汝楠十首

王梅四首

程瑤三首

趙伊五首

錢薇三首

吳嶽二首

朱衡一首

范欽二首

林應亮一首

蘇志皋四首

周復俊一首

浦應麒一首

顧存仁一首

包節一首

白悅一首

謝少南一首

廖希顏六首

李徵一首

王廷幹一首

沈越一首

秦鳴夏一首

姚虞一首

高應冕五首

陳芹二首

王鏞二首



薛欽三首

謝啓元一首

卷十九

尹臺十二首

郭朴二首

趙貞吉二首

王立道十首

靳學顏五首

王維楨六首

劉繪五首

趙大佑一首

林廷機三首

何維柏一首

康大和一首

馬森一首

張舜臣一首

孫植一首

張瀚二首

陳鳳六首

林應麒一首

牛恆二首

施峻一首

趙統二首

陳暹三首

許穀四首

任萬里二首

陳棐一首

薛應旂一首

盧宗哲一首

郭萬程一首

陳策一首

汪宗凱一首

胡汝霖一首

洗桂奇一首

陳紹文一首

陶庚一首

卷二十

何御二十一首

沈鍊一首

徐良傳三首

萬虞愷一首

陳堯一首

劉佐一首

駱文盛一首

鄭富一首

李樂一首

饒相一首

黃釧一首

蔡宗堯二首

郭文涓二首

喬世甯十七首

周怡一首

袁煒一首

蔣宗魯一首

陳昌積一首

黃注一首

楊載鳴一首

王炯一首

茅坤一首

莫如忠二首

周鯤一首

王崇義一首

黃洪昆一首

林萬潮一首

陳應魁一首

符驗一首

溫新一首

劉乾一首

王健一首

馬廷錫一首

劉熠一首

程應登二首

方興邦三首

卷二十一

邢一鳳一首

陸樹聲三首

方逢時十五首

王崇古一首

萬士和四首

林懋和三首

謝東山一首

雷賀一首

范惟一一首

殷邁一首

陳時範一首

王應鍾一首

何遷二首

王材二首

邵元善二首

向覺一首

卷二十二

金鑾十七首

徐麟六首

賈惟孝二首

萬衣一首

洪朝選一首

龔秉德十首

鄭渭一首

張鐸一首

何孟倫一首

董份五首

許邦才十首

沈九思一首

趙邦彥六首

湯珍四首

董難四首

張本七首

傅起巖一首

何炳一首

潘城一首

丁玘一首

晏睿一首

蕭引鳳一首

張軌一首

# 明詩紀事卷一

## 戊籤

楊慎五十九首

慎字用修，新都人。大學士廷和子。正德辛未，第一人及第，授修撰，以議禮杖謫永昌。天啟初，追諡文憲，有升菴集八十一卷，遺集二十六卷。

四庫總目：慎以博洽冠一時，其詩含吐六朝，於明代獨立門戶。

薛薰考功集：升菴詩窮極詞章之綺靡，可以見其卓絕之才；牢籠載籍之菁華，可以見其宏博之學。唐四傑不能過也。

升菴集：陸賈南中行紀云：南中百花，惟素馨香特酷烈。彼中女子，以採絲穿花心，繞髻爲飾。梁章隱詠素馨花詩云：細花穿弱繡，盤向綠雲鬟。用陸賈語。貫花繞髻之飾，至今猶然。予嘗有詩云：金碧佳人墮馬粧，鷓鴣林裏採秋芳。穿花貫繡盤香雪，曾把風流惱陸郎。姜孟寶笑謂予曰：不謂陸賈風流之案，千年而始發耶。

藝苑卮言：楊用修詩如暴富兒郎，銅山金埒，不曉喫飯著衣。用修謫滇中，有東山之癖，諸夷曾欲得其詩，輸不可，乃以精白綾作械，遣諸伎服之，使酒間乞書。楊欣然命筆，醉墨淋漓，裾袖會重賞伎女，購歸裝演成卷。楊後亦知之，便以爲快。用修在瀘州，嘗醉胡粉傅面，作雙丫髻，插花門生皂之，諸伎捧觴遊行城市，了不爲忤。人謂此君故自污非也。一措大裹絳衣，亦何所可忌，特是壯心不堪牢落，故耗磨之耳。

國雅楊修撰詩如錦城雪棧險怪高峻

詩戲楊用修格不能高而清新綺縟獨撮六朝之秀合作自斐然如題柳七言律云垂楊垂柳縮芳年飛絮飛花媚遠天金距鬪雞寒食後玉蛾翻雪暖風前別離江上灤河上拋擲橋邊與路邊遊子魂銷青塞月美人腸斷翠樓煙風流蘊藉字字天成如初發芙蓉鮮華莫比滇中作春興八首語亦多工

焦竑玉堂叢話正德丁丑歲武廟閣文獻通考天文星名有注張問欽天監不知爲何星也內使下問翰林院同館相視愕然楊公慎曰注張柳星也周禮以注鳴者註注味也史記律書南方諸鳥七宿柳爲鳥之味也史記律書西至於注張漢書天文志柳爲鳥喙內使以復同館戲曰子言誠辯且博矣不干私習天文之禁乎嘉靖初給事中張紳疏有喬宇嵬瑣四字上令閣內閣不知也慎取荀子非十二子篇以復梁文康歎曰用修之強記何必減蘇頌乎

續玉筍詩談升菴題唐僖宗行宮柱礎云唐帝行宮有露臺礎蓮幾度換春苔軍容再向蠶叢狩王氣遙從駱谷來萬里山川神駿老五更風雨杜鵑哀始知蜀道蒙塵駕不及胡僧度海杯礎今故在游太初爲予言寺僧令匠鑿而丹之乃知李文饒方竹未嘗無對

明詩選宋韓文曰用修病在貪博故使事處往往求巧得拙要其天才本是奇麗如百寶流蘇陳臥子曰用修繁蔚之中時見新警李舒章曰用修山光嵐翠金碧之中時見雲霞之潤

王士禛皇華記聞楊用修在滇製小肩輿如升之形僅可容膝張愈光舍題一聯其上云人到東京須氣節地當西晉且風流所謂升菴者以此

香祖筆記明詩至楊升菴真以六朝之才而兼六朝之學者其詩如詠柳垂楊垂柳縮芳年一篇世共知之又古意浚波洛浦遇陳玉鷓鴣詞秦時明月玉弓懸關山月迢迢賤妾隔湘川出關擬唐人狼弧芒角正彎環塞下曲長榆塞上接龜沙諸篇工妙天成不減前作又青蛉行寄內絕句亦絕妙大抵皆自古樂府出益都王遵坦太平論明詩獨推新都爲性之者亦自有見

明詩別裁。升菴以高明伉爽之才。宏博絕麗之學。隨題賦形。一空依傍。于李何諸子外。拔戟自成一隊。五言非其所長。以過於穠麗。失穆如清風之旨也。

田按升菴詩。早歲醉心六朝。豔情麗曲。可謂絕世才華。晚乃漸入老蒼。有少陵謫仙格調。亦間入東波涪翁一派。前後七子。執盟疆壇。海內附和。翕翕成風。余採升菴蘇門君采。稚欽。鴻山。夢山。子安。少玄。數君子詩。次於李何之後。王李之前。別爲一集。以見豪傑能自樹立者。類不隨風會爲轉移也。

### 關嶺曲

關索嶺。四十三盤高。前有安龍箐。行人莫辭勞。

### 禽言

勸君早歸。君歸恨不早。鐵橋銅柱靈山道。熨雲爨霧連晴昊。客頭未白心先老。歸恨不早。

### 游女行

東風春正韶。南浦美人嬌。下蔡君休問。上宮誰敢邀。折花斜寶珥。映水正金翹。娉婷惜未嫁。應待逐文簫。

### 梅花落

古梅飄古香。新梅綴新粧。那枝傳妾恨。何樹近君鄉。

### 峽東曲

白帝到江陵。一千二百里。欲試一日程。須待春水起。布帆一百尺。出自三梭織。風順早歸來。天際遙相識。



江陵別內

同上洞庭波。獨上西陵渡。孤棹泝寒流。天涯歲將暮。此際話離情。羈心忽自驚。佳期在何許。別恨轉難平。蕭條滇海曲。相思隔寒燠。蕙風悲搖心。齒露愁沾足。山高瘴癘多。鴻雁少經過。故園千萬里。夜夜夢煙蘿。和余懋忠青衣別後追寄之作

抽簪畫江沙。寫出腸斷詞。遙寄百里人。見君昨夜思。昨夜復今朝。百里又千里。歡遊坐成隔。乖離從此始。乖離渺何許。異國猶鄉土。雲從青衣來。月自峨眉吐。雲月兩悠悠。光景爲君留。因之託宵夢。遠到海西頭。送徐用先歸嘉州

客有歸歎嘆。言從隱者流。高議在青瑣。吾道付滄洲。滄洲多故人。夙昔諸幽賞。嘯歌丹崖邊。攜手紫霞上。壁津春水生。波浪動江城。岷嶺秋芳落。清音漢蘭若。亦知江湖憂。不廢登臨樂。迢迢結桂枝。望望阻相思。殷勤三歲字。惆悵四愁詩。伊予慕倜侶。睽離分晤語。何時峨眉雲。來作人間雨。

玉蟾寺

我問金鰲僧。誰名玉蟾寺。題自黃涪翁。苔蝕銀鉤字。佛住兜羅界。僧居琉璃地。絕頂似高秋。清涼失炎季。解鞍契夙心。橫枕諧幽思。岫幌雲勿扃。結夏期重至。

賦得烏龍山送安公石

亭亭烏龍峰。屹立九頂左。翠微壓洪濤。清音叩危坳。沈犀星渚幽。浮槎雪涔妥。風雲徑路通。烟霞巖洞鎖。若人富奇遊。茲山近燕坐。弭節入仙源。心賞忘旅疴。迢遙海月期。薜蘿江花朵。日下遲來音。天際候歸舸。

題唐人閨秀熨帛圖

碧梧葉落紅閨晚。玫玷敲月催金翦。重重海簾銀蒜垂。曲曲山屏阜羅展。廣儲懸月月初臨。緹幕染霜霜已深。禁葺銖衣圍夜玉。嵯峨寶髻辟寒金。雲母箱闔同心鎖。鈎鉞香浮九微火。秦篝齊縷鬪紛華。蜀錦吳綾分婀娜。熨帛申繪憶遠行。遙遙夜夜不勝情。百層妾住垂花隴。萬里君居碎葉城。垂花碎葉音塵隔。春去秋來感行迹。深閨心斷結蠶書。絕塞眼穿無雁帛。明燭蘭膏照獨眠。峨眉曼淥爲誰妍。試看裴羽相思夕。何似徐吾共續年。

題夏仲昭竹寄陶良伯驥

太常胸次瀟湘寬。少年愛寫生琅玕。白頭藝苑更入妙。筆法遠追王孟端。兩家名藻雄吳下。品題未覺風流亞。一紙能令百世傳。兩竿不啻雙金價。人言畫竹非畫工。草書結構將無同。誰家高堂名寶繪。徐熙花鳥迷青紅。主人佳興松江東。寄圖索賦隨長風。遙知把玩清香裏。正是相思月明中。

射虎圖爲箬溪都憲題

錢選好手工。白描粉墨丹青色。阻喪細觀逸迹迴不俗。氣骨深穩形蕭放。中丞此圖開似我。行行遊獵極

殊狀漢家昔日李將軍。生射猛獸天下聞。彎弓半夜沒白羽。飛鞍晴晝生黃雲。今之圖畫無乃是。披卷似覺陰風起。積雪慘淡長白山。草木蒼乾松漠間。將軍身乘大宛馬。從騎亦是驍雄者。合圍射虎虎帶箭。相持不肯遽相下。虎鬪馬驟兩若飛。咆吼欲震長平瓦。東海黃公魯卞莊。裴旻舞劍相頡頏。古來英英者。數子繪事簡冊傳芬芳。何物少陵愁杜甫。短衣南山思射虎。老驥伏櫪悲鳴苦。壯士哀歌淚如雨。天狼煌芒直威弧。安得此輩西滅胡。卻走馬蹄報神都。爲獻單于款塞圖。

高曉曉發過滇

碧雞關頭月上霞。高曉海色分人家。菱塘眠柳猶藏鴉。雙雙柔櫓聲啞啞。船尾風輕浪不花。轉盼已屆滇之涯。

交河令行贈袁子變

袁侯出宰古交河。銅章墨綬雜雕戈。黃雲高闕芳菲少。紫塞長城氛祲多。桑榆蔭入嫖姚幕。絃誦音諧敕勒歌。公主琵琶玉連瑣。將軍駿褭金盤陀。袁侯雕龍且韜豹。白羽指揮坐中譟。阮瑀軍書王粲詩。魯連飛箭劉琨嘯。始信扶顛籌策長。赫赫威棱動北荒。虎鈴帳外關山月。燕寢香中鼓角霜。君不見隆州虞允文。海鷗船破百萬軍。又不見巴渝甘興霸。江表虎臣雄吳下。古來文武道本同。樽俎笑談能折衝。六鈞弓與一丁字。譚言悠悠非至公。

觀打魚

石梁水落天波澄。漁人放網如放鷹。編筠作航來往便。往似飛梭來似箭。蛟潭無極龍堂幽。江空獺飢漁人愁。漁人愁。河魴喜。清江一曲孤煙起。

河橋篇寄用貞懋昭

渾河流水桑乾潮。何年伐石架長橋。玄蘿窟近填烏鵲。滄海波平上赤霄。尋源知近遠。浩浩鴻流滿。平連太液池。迴接昆明苑。帝里神皋紫氣中。天江析木銀潢通。澗灑卜落應相並。灞滻朝宗詎可同。星傳雲槎下城闕。電逝颿馳交翼越。橋外車音響若雷。橋畔闌干明似月。可憐楊柳裊晴煙。才見藏鴉又噪蟬。東西溝水分歧路。南北煙霜感歲年。沈璜使者辭芳甸。聯璧才人遙出錢。別浦晴沙漾縠紋。回澗秋濤收組練。飛蓋臨風緩去旌。青門落日彩霞生。懸知濯錦江邊夢。轉見蘆溝河上情。

送客還西江

武昌楊柳荊州麥。楚江春色催行色。萬里遙憐左蠡人。十年同作南滇客。烏柏門前紫荇莊。歸來養拙更何鄉。鬱金美酒盈千斛。藥玉新筠醉幾場。

江樓曲送祝鳴和

江上樓。高枕錦江流。雲霞連劍閣。煙樹出刀州。登樓送君秋色裏。旌旗影落清波水。眺望應隨斗牛遙。嘯

歌直感魚龍起。江樓高。江思遠。闌干曲曲山宛宛。雁湖寒。牛渚晚。石頭城。如在眼。王人過家朝玉京。離筵一餉惜離情。別來定有相思賦。好寄同聲慰友生。

月溪曲爲晉甯張太守賦

青天行月溪行水。水月相去八萬里。龍宮罔象巧能移。月行翻向清溪底。月溪主人家在涪江濱。襟懷洒落意清真。金波影裏流金篆。玉練光中臥玉輪。月溪子。君不聞。一月普現一切水。一切水月一月攝。洞鑒虛明有如此。又不見東坡赤壁水月賦。太白青天問月歌。二仙仙去去不返。廣寒宮闕高嵯峨。今夕復何夕。逢君螳螂河。舉頭見明月。正照金叵羅。持斧邀吳剛。開篷納嫦娥。殺卻蝦蟆綠烟滅。斫卻桂樹清光多。共言銀燭未須秉。不飲如此良夜何。仙舟歸來仍我過。解紅輦。舞柘枝。傜。主人踉蹌客逃席。起看江月墜江波。君家侍立小童清似玉。劈牋泥我醉寫月溪曲。

東坡先生守湖州。遊道場山。命官奴秉燭寫風雨竹一枝於壁。題詩其上。至正間吳仲珪有臨本。少岷丈藏之。慎作長歌。

東坡老守湖山暇。南國清遊繼顏謝。舟楫行供茗雪吟。烟雲坐入瀟湘畫。越人翠被雨波寒。官奴綿麗歌聲殘。揮毫寫出風中態。掀筆猶疑掌上看。琅玕落紙珠生唾。畫絕名縑詩寡和。未論品價重三都。先有風流傾四座。仙翁一去幾春秋。江光清徹魚龍收。珮環夜冷黃州夢。簫韶天遠蒼梧愁。梅逕何人深慕蘭。欲

從手軸傳心印。文藻葳蕤。價逼眞。筆端飛動。唐臨晉。玉雪曾郎瘦。竹姿青門別。我滄州期。滄州吏隱。丹霞想。想見珊瑚拂水枝。

送譚汝賢之常德

子昔逍遙龍門之橋。子乘五馬蜻蛉之野。龍橋爲別。蛉野見夢。境分明。速流電。忽漫相逢。復語離。澧蘭沅芷。楚芳時。後期相期。未有期。長風長寄。長相思。

題趙東臺藩伯畫汪方伯周潭圖

青嶂插雕梁。白波吹粉壁。周潭之景在咫尺。斷崖韋偃樹。橫靄郭熙山。東臺之筆縹緲間。我雖不善畫。鑒畫莫如我。籠煙渲水墨如金。苦心獨識良工頗。詩興長凝燕寢香。眞遊遙寄洪濤杙。船虹貫月棟飛雲。犀臙龍綾如絨鎖。

春江曲

時女玩春翹。新梅發遠條。風香隨步步。雲彩豔朝朝。悵望迷晴浦。音書候晚潮。玉輪江上水。心斷木蘭橈。趙龍巖少參載酒過普賢寺還舟同醉賦此

鷺寺敞初筵。鷗波送酒泉。沈陰迷卜晝。爛醉忘回船。別夢昆明水。離心蜀國弦。側身東望處。高誼屬雲天。李文瑞自金沙窮源至

使者尋源至。將軍上隴回。江流通沫若。雲氣自昂峽。古樹桃榔出。殘花苜蓿開。關山有明月。今夜近香臺。

留別三池

垂老復生離。相思天一涯。四愁憐遠道。五噫感明時。樹繞青衣國。花深黑水祠。從茲萬里去。莫遣雁書遲。

贈玉蟾僧

山是岷峨派。峰如岫嶺尖。仙遊還駐鶴。僧號亦栖蟾。蘿月懸天鏡。松風襲暮禪。有詩休疥壁。徒爲葛藤添。

辰州留別王文濟

五峰蟠五溪。愁望跼鳶低。三巴接三峽。客淚聽猿啼。夢繞浮雲北。身遙落日西。歸期無歲月。春草又萋萋。

琴姬

離筵良夜如何。張女清琴當歌。商聲若出金石。楚奏渾非綺羅。浮雲柳絮無蒂。明月桂華有波。伯牙意在山水。湘靈休鼓雲和。

十六日丙寅雲頂山寺

昨暝靈燈淨土。茲晨廣濟盤陀。三百六十飛陞。八萬四千宰波。灌頂涼生甘露。妙鬘雲結兜羅。何處松濤清轉。似聞魚山梵歌。

春興

諸葛提兵大渡津。河流禹鑿迴如新。彩雲城郭那無迹。黑水波濤亦有神。象馬遠來銅柱貢。犬羊不動鐵橋塵。靈關在眼平於掌。歲歲蒲桃苜蓿春。

謁二忠祠

學士文章謁日月。尙書劍履上星辰。九原松柏香臺夜。雙廟莓苔影坐春。山鬼嘯歌攀薜荔。海童奔走薦芳蘋。經過此地同揮淚。況是江潭放逐臣。

見梅花

一辭青瑣滄江臥。山城三見梅花破。正愛家家臨水開。還愁樹樹和烟墮。清樽欲醉不成歡。雪調空歌誰與和。小院回廊日又斜。高樓短笛風前過。

弔孟拾遺

駱谷鸞輿再播移。橫流滄海廣明時。刑餘周召田中令。地下逢干孟拾遺。赤水探珠迷象罔。青霄蝕月任墓頤。懷沙沈石何曾問。帳殿毬宮總不知。

病中秋懷

遶蓬城西百尺樓。登茲銷暑亦銷憂。江山平遠難爲畫。雲物高寒易得秋。吉甫清風來玉塵。涪翁妙墨換銀鈎。餘甘渡口斜陽外。靄迺漁歌雜棹謳。



百梅亭

綠萼紅跗映碧瀧。山香水調換新腔。翰林風月三千首。樂府鴛鴦七十雙。陳閣臨春森玉樹。漢宮不夜爛金缸。梨雲梨雪都成夢。桃葉桃根枉渡江。

次雲樓上公韻五月十九日魚池雅會

環衢窈窕錦亭東。珍樹留春綴繡紅。鳥度屏風青嶂裏。魚窺明鏡碧瀾中。賓筵鄴下詩篇盛。軍次漁陽鼓角雄。獨有白頭虛授簡。梁園應愧長卿工。

冬夜宿羅漢寺

霜林金碧迷青紅。木葉蕭蕭澄遠空。長湖洲渚亂吞吐。上方樓殿森玲瓏。廊僧暝汲怯寒溜。舟子夜語驚天風。朝噉照檻堪一望。羨爾冥冥高遶鴻。

秦始皇陵

埽旦金星白晝懸。似傷鶉首翦秦川。俄傳江璧神徂日。誰見鈞天夢帝年。借問茅焦歷井幹。何如徐福泛樓船。烏錐三月咸陽火。還是書坑竹帛煙。

平山橋離夕贈任直夫

平山橋畔水沄沄。隄楊風裊陌草薰。綠蟻行觴九蘭醞。青驪出餞五花文。遙夢直挂嶺南月。離歌不散江

東雲誰言千里非絕國。已覺黯然銷別魂。

春晴

曉枕忽聞黃鳥歌。起看芳草紛成窩。梨花杏花風信早。晴雲雨雲春態多。青絲玉壺銀鑿落。紅韁寶鉸金盤陀。駘蕩神皋足游衍。其奈文園病渴何。

雨阻太華之遊中宿華亭寺釋智充山樓

信宿零雨不肯歇。咫尺太華那可登。平湖粘天波杳渺。長林籠霧寒淩兢。山樓暝榻對漁火。野竈晨炊分佛燈。皋橋酒家幸相近。徑欲取醉酣騰騰。

春泛滇海至小孤浪山

海藻海花春競鮮。東流東風新泛船。雜英芳甸漢皋珮。虛籟聲林湘國絃。菰蒲叢叢綠堪把。檉柳枝枝青可憐。茗芋不共習池醉。觸忤良爲羈思牽。

十一月十三日雪

飛雪正應大雪節。明年復是豐年期。山城豺虎戶且閉。水國鼃鼃舟懶移。竹葉金樽慣貰酒。梅花玉樹工撩詩。擁爐熾炭坐深夜。笑看燈前兒女嬉。

觀妙亭新梅始放花月夜獨酌

錢臘迓春梅有期繁苞不駛亦不遲分梢已出月右脇抽箭忽橫參左旗倚牀三弄競筠琯夾門一條爭柳姿陶潛詩梅樹夾門雙雙遏雲付清囀九九消寒須泛卮

蘇祠懷古

眉山學士百代豪夜郎謫仙兩爭高岷峨凌雲挾天藻江漢流湯驅硯濤虎豹虬龍自登踞鱔鱔狐狸休舞號井絡鍾靈竟誰繼海若望洋增我勞

有贈

添聲楊柳葉唐裴誠有添聲楊柳詞減字木蘭花不學東山傅哀箏惱鬢華

草堂寺

劫毀變巴火碑失周顥字試問坐禪僧猶記梁朝寺

卽事

蘋末清風起涼生近水樓盈盈樓上女齊唱楚江秋

松隱菴

松菴饒古松露鬣交雲尾蘿徑少行人日暮嘯山鬼

楚江曲

巫山花已紅。楚水波新綠。兩兩浣紗人。照影鬪粧束。

王子淵祠

煒曄靈芝發秀翹。子淵攜藻挾天朝。漢皇不賞賢臣頌。只教宮人詠洞簫。

竹枝詞

紅粧女伴碧江濱。蓮草花簪茜草裙。西舍東鄰同夜燭。吹笙打鼓賽朝雲。  
無義灘頭風浪收。黃雲開處見黃牛。白波一道青峰裏。聽盡猿聲是峽州。

詠史

月仗雲門五彩毬。御前爭賭最先籌。須臾贏得西川印。便脫青衣擁碧油。

于役江鄉歸經板橋

千里長征不憚遙。解鞍明日問歸橈。真如謝朓宣城路。南浦新林過板橋。

居易錄。李侍讀漁村。瀟行日記。載板橋驛。驛壁有題句云云。甚有風調。不知誰作。按此升庵詩也。瀟程記云。楊林達板橋。號三亭。實六亭。

無題

青雀銜花向海東。非烟如黛掃晴空。小喬嫁後風情減。曾見新粧亞水紅。

花汀曉夢

秦樓織月隱花汀。煙淡春山曉黛青。一百八聲鐘吼罷。夢回七十五長亭。

# 明詩紀事卷二

## 戊籤

高叔嗣三十四首

叔嗣字子業。祥符人。嘉靖癸未進士。授工部主事。改吏部。歷員外郎中。出爲山西參政。遷湖廣按察使。有蘇門集八卷。

四庫總目。叔嗣詩初受知於李夢陽。然擺脫窠臼。自抒情性。乃迥與夢陽異調。

陳東后岡集。弘治文教大起。學士輩出力振古風。盡削凡調。嘉靖改元。更爲初唐之體。蘇門高子業。束髮就傅。受知北郡李生。弱冠登朝。亳州薛考功一見歎服。旣雅見推重。益自貴珍。謝絕品流。因心師古。涉周秦之委源。酌二京之精祕。會晉餘潤。契唐本宗。每有屬纊。佇興而就。甯復罷閣。不爲淺易之談。故其篇什往往直舉胸情。刮抉浮華。存之隱冥。獨妙閑曠。合於風騷。有應物之沖淡。兼曲江之沈雅。體王孟之清適。具岑高之悲壯。詞質而腴。興近而遠。洋洋乎斯可謂之詩也。

中麓閒居集。何李雖成大家。去唐卻遠。蘇門雖云小就。去唐卻近。蔡白石。王巖潭。以蘇門爲我朝第一。其言雖過。要之不可厚非也。

藝苑卮言。高子業詩如高山鼓琴。沈思忽往。木葉盡脫。石氣自青。又如衛洗馬言愁。憔悴宛篤。令人心折。子業少負淵敏。生支干與僞漢友諒同。旣遷楚臬。恆邑邑不自得。發病卒。實友諒彭湖之歲也。其詩如積賤詎有基。履榮誠無階。旣妨來者途。誰明

去矣懷。茫然大楚國。白日失兼城。久臥不知春。茫然怨行役。爲客難稱意。逢人未敢言。失路還爲客。他鄉獨送君。衆女競中閨。獨退反成怒。寒星出戶少。秋露墜衣繁。以我不如意。逢君同此心。當軒留駟馬。出戶倚雙童。里中夷門監。牆外酒家胡。爲農信可歡。世自薄耕稼。問年有短髮。逐世無長策。林深得日薄。地靜覺蟬多。文章知汝在。功名何物是。騎馬問春星。殘雨夕陽移。清婉深至。五言上乘。

吳國倫。顛顛洞藪。獻吉。仲默。竝策上駟。而馳中原。高子業雖驂駕。第緩轡後至耳。

國雅。子業負奇氣博雅。其詩磊磊喬松。凌風迴秀。響振虛谷。

詩藪。高子業視李何後出。而其五言古律之工。不欲作今人一字。在唐不減張曲江。韋蘇州。

梁園風雅。子業負淵敏之才。有抗潔之性。爲詩多胸臆語。吐言成章。不假緣飾。誦之若落落直致。而中自豐腴。

明詩選。陳臥子曰。子業沈婉雋永。多獨至之言。讀之如食諫果。味不驟得。又曰。詞存清曠。意成悽楚。

池北偶談。明詩本有古澹一派。如徐昌國。高蘇門。楊夢山。華鴻山輩。自王李專言格調。清音中絕。同時王奉常。小美。作藝圃。擷餘。有數條。與其兄及濟南異者。予特拈出云。今之作者。但須真才實學。本性求情。且莫理論格調。又云。詩有必不廢者。雖衆體未備。而獨擅一家之長。如孟浩然。洪洸。易盡。祇以五言雋永。千載並稱。王孟。有明則徐昌國。高子業二君。詩不同而皆巧於用短。徐有蟬脫軒舉之風。高有秋閨愁婦之態。更千百年。李何尙有廢興。二君必無絕響。此真高識。迴論。令于鱗。大美。早聞此語。當不開後人抨彈矣。

田按。子業襟抱既超。故吐屬蘊藉。有魏晉人標致。次亦不失爲孟襄陽。韋蘇州。自敘云。李空同方盛。邑子之屬。出其門。撰爲文辭。模於古人。私心不能無慨慕。時時竊撰一二篇。夫本非所長。而強力慕之。度必取調於衆。可以明其宗旨矣。陳束之蘇門集序出。一時名流。捧手歎絕。可謂玄賞。

少年行

死士結劍客。生平藏博徒。里中夷門監。牆外酒家胡。有時事府主。無何擊匈奴。虎頸一侯印。猿臂兩雕弧。誓使名王侍。羞聞邊吏誅。長驅隨漢馬。轉鬪出飛狐。蒲壘遂破滅。莎車不支吾。甲第起北闕。蠻邸開東都。豈學霍嫖姚。椒房仗子夫。

明月引

滿地金波迴。中天玉鏡飛。有烏多夜語。無雁不春飛。影徹銀河水。光翻織女機。何當御尊酒。常此奉澄暉。

歲暮作

日夕茲歲改。蕭條旅思多。雲物媚晴宇。氣候屬妍和。崢嶸新陽至。故景實蹉跎。感時豈不懷。二紀倏焉過。栖身慚擇木。望道歎伐柯。如匏吾自繫。匪玉孰爲磨。有髮日就長。心短獨若何。但云畢夙志。陳力豈知他。

謁海上人相

京邑驅匹馬。日有塵沙顏。清晨整巾幘。時叩高僧關。白日照仙閣。晴雲滿空山。相看偶一笑。念此客身閒。富貴不可求。余將從此還。

生日

年往歲空除。時來循虛至。明兩無留晷。吹萬有逸氣。我行淹一周。茲辰適再值。束髮歲更七。算齒紀逾二。



少懷滄洲心。壯損青霞志。淮禽終異化。魏瓠始同棄。五游存予歡。三費亡吾忌。達生庶不疚。乘流隨所寄。  
登真定大悲閣

關山千餘里。平分南與北。臨路兩悠悠。客子情何極。青山地北橫。白日天南落。欲緩故園思。聊憑最高閣。  
送別永之

憐君方遷戍。況我嬰愁疾。一別若流雲。相從竟何日。平生重交遊。弱冠弄篇帙。書願藏名山。功期銘石室。  
安知事不就。跌宕情如一。已矣復誰陳。今亦返蓬篚。

再去都別親知

少缺經世用。遭遇明時康。出入在省闈。仰逐羣賢翔。譬如駑馬足。側畏道路長。顛躓不終朝。中歲還故鄉。  
願言守舊廬。沒齒乃其常。皇恩究微物。明照收羣方。改服起漁樵。端笏陪鷓行。頑疏果難容。進退益多妨。  
猶參大藩居。守此國西疆。華階豈不崇。榮進非所望。退念孤蹇迹。臨路私自傷。無爲世俗遷。久要不可忘。

再同子延上方寺賦

已忝陽春遊。再陪瓊瑤作。首歲與君同。名區踐初約。芳風散入林。陰靄遞相薄。微雨點春城。流雲蕩仙閣。  
樓當望遠立。酒共馮高酌。樹裏梁王臺。水際夷門郭。伊余本孤蹤。事主乏明略。偶因負郭田。解印歸邱壑。  
閑居道心增。日戀空門樂。安得拙病軀。放達從此託。

答谷司僕見問

幸自返中園。非關逃微祿。方因疾病餘。黽勉供樵牧。春至東郭田。夏來北林木。時從遠原上。日縱平郊目。野老逢與言。道書間能讀。何爲共世人。無事相追逐。勞君問出處。日暮掩茅屋。

與客集和氏園

惟君遊每接。自余居多暇。留連上客筵。款曲中園駕。賦詩芳泉側。舉爵茂陰下。放心安知憂。攜手不能罷。日氣淡將夕。雲影垂方夏。爲農信可懽。世自薄躬稼。

九日登城樓宋故都門

佳節倚秋城。朋曹晚相逐。竊憐坎壤心。暫寓登臨目。日落故鄉杯。霜寒遊子服。百里覽山河。千年看陵谷。生欣盛時康。追歎亡王促。帝功頽九五。霸氣消百六。猶能識宮觀。但見登樵牧。縱酒在高樓。悲歌對喬木。身同司馬病。懷異步兵哭。舉頭望長天。萬里來鴻鵠。

夏夜同袁德延騎出宿村家

景落息炎氛。輕策稍相試。微風送林木。皓月臨平地。路遠忘前期。情愜隨所至。田父止我宿。茅屋勸客醉。起步中天空。仰對明星次。一與雞黍筵。三歎前賢意。軒冕愁束縛。江海傷憔悴。明發返故墟。努力看身事。

劉西陂函山二先生見過

簡略缺世用。守此郊扉居。天寒草樹盡。臥病情何如。臺臣存舊好。宴飲及吾廬。伊昔趨天階。俱銜君子惠。提攜文苑游。出入鷓行綴。良時未可忘。世故身相繫。安知尊酒同。歲暮荒城際。無輕一日歡。乖離幾更歲。

秋夕

問年有短髮。逐世無長策。日已遠人徒。秋方臥阡陌。天高星流火。夜久月生魄。萬形觀此化。四運愁相迫。身非塞北翁。情是周南客。聊齊得喪心。安此留滯迹。

秋日贈別諸進士

別館敞秋晴。離筵蕩客情。致身付公等。分手使人驚。陽鳥迎霜動。陰蟲候夕鳴。贈言何以歎。虛薄媿吾生。行至車騎關。河南界盡處。與親知別。

山河未可盡。行處與春長。驛路沙俱白。關門柳欲黃。親知還自返。離別各相望。且緩征車發。中心戀故鄉。途中憶樊少南。便別行至安肅縣。作。

驅馬一相見。悠悠難再逢。客心春夜月。官舍白溝鐘。不免微名累。其如多病慵。空臨南北路。愧此平生蹤。安肅縣寺病居。漢陽董玄亮見過時。董奉使還闕。

門前易水路。下馬漢陽人。野寺天晴雪。他鄉日暮春。相逢一尊酒。久別滿衣塵。不憚王程急。應憐伏枕身。

謝病後初朝

舊識趨朝路。重來謁帝廷。出門聽曉漏。立馬望春星。拙病身仍在。羈栖志少甯。盛時誰不戀。終日憶山垌。  
寓居慈仁寺游覽

終日仙宮掩。青松繞殿遮。到來長春草。行坐落天花。閣上王城盡。門前官路斜。微身隨處是。何敢歎吾家。  
毘盧閣上同伍疇中諸公西望

客來常一上。對此西山平。向夕檐楹立。憑空閣道行。楊花飛暮野。雨色動春城。卻戀同攜手。都忘羈旅情。  
飲任文選宅

敢謂齊年齒。常嗟抱夙心。文章知汝在。交契爲誰深。華屋春燈豔。層城夜柝沈。賴蒙終夕語。客路一開襟。  
與鄒生游香山宿僧房

處愁春草歇。驅馬春山中。夜宿禪關下。時將心賞同。風生近谷滿。月照前湖空。終愧淵明輩。玄言對遠公。  
歲暮答許武部廷議懷歸

掩閣日愁晚。他鄉歲已深。未能逃世網。豈是戀朝簪。以我不如意。憐君同此心。故園春事及。歸路儻相尋。  
呈劉西陂先生將按部洛陽道出小園

喧言洛陽去。卓蓋首行春。尙枉柴門步。應憐伏枕身。柳條簇官驛。雪色沒征輪。公問袁安事。平生解避人。  
偶題

久爲南畝客。況此北窗時。翻笑陶元亮。應多歸去辭。涼風昨夜起。殘雨夕陽移。坐臥身無事。茫然生遠思。  
曉起

惆悵空堂曉。蕭條秋氣陰。懸窗對疏雨。落葉滿重林。長往懷仙事。端居養道心。誰知歲復晚。高志莫能尋。  
冬日西園

泱泱空寒野。蕭條只舊林。登高時送目。望遠日愁心。世與身爲累。貧將病轉深。無能學袁盎。閭里共浮沈。  
星輶驛雨中別林八南還

驛外陰雲合。窗中宿雨含。深巖龍自鬪。險路馬能諳。短髮星星甚。長愁日日堪。休將南望淚。歸傍二親談。  
駕出

帝出南郊日。言觀黃屋尊。選神役風伯。徙樂具雲門。馳道青陽麗。齋宮紫氣屯。九朝祠禮祕。歸待侍臣論。  
仲春山行

春事殆過半。客行殊未閑。流雲開白日。微雨點青山。身世本遲鈍。林泉當早還。煙郊草色長。感此奈愁顏。  
襄縣城東卽事

春晴汝岸曲。夜雨襄祠東。日出冥濛靄。天垂斷續虹。關梁臨水閉。馳道與山通。旦夕龍輿度。千城望幸中。  
晚出都門登寺閣

柳葉桃花雨夜乾。今年寒食在長安。淹留不爲依雙樹。蹭蹬合應笑一官。行出都門常日暮。到來客舍已春闌。芳菲滿眼心無奈。祇上毘盧閣上看。



# 明詩紀事卷三

## 戊籤

薛蕙三十八首

蕙字君采，亳州人。正德甲戌進士，授刑部主事，改吏部，歷員外郎中，以議大禮下詔獄，尋復職。未幾罷歸，有《考功集》十卷。

四庫總目：正嘉之際，文禮初新，北地信陽，聲華方盛，蕙詩獨以清削婉約，介乎其間。古體上挹晉宋，近體旁涉錢郎，雖亦擬議多而變化少，然當其自得，覺筆墨之外，別有微情，非生吞漢魏，活剝盛唐者比。又蕙與湛若水俱爲嚴嵩同年，嵩權極盛之時，若水年已垂耄，不免爲嵩作鈐山堂集序，反覆推頌，頗爲盛德之累。蕙初亦愛嵩文采，頗相酬答，迨其柄國以後，薄其爲人，凡舊時倡和，悉削其稿。人品之高，迥出流輩，其詩格蔚然孤秀，實有自來，是其所樹立，又不在區區文字間也。

王氏家藏集：阮公詠懷，間亦有迫切者。君采反優游寬暇，有漢人意，可謂妙擬矣。

藝苑卮言：薛君采詩如宋人葉玉，幾奪天巧，又如倩女臨池，疏花獨笑。

國雅：君采七歲能文，弱年擅藝，古體如江南曲，從軍行，甚佳。近體如詠燭云：珠簾照不隔，羅幌映疑空。又餘花飄近渚，衆鳥喧深竹。征鳥不返顧，浮雲相背馳。落花藏笑語，沙鳥亂歌聲。翠帷低舞燕，錦薦踏驚鴻。並是警句。辟之馬飾金羈，連翩蝶躩，穩步康莊，了無踟躕之迹。



詩戴弘正五言律自李何外如薛君采之瀟灑溫醇高子業之精深華妙置之唐人毫無愧色

梁園風雅西原咀英魏晉振秀齊梁意繇密而辭新格醇雅而調逸

明詩選陳臥子曰君采詩如貴主初降雲駟鸞輅懸珠編貝自然莊麗李舒章曰君采如出閣好婦意態妍莊未能跌宕

靜志居詩話薛公南巡諍吏大禮正人條達詞源淵源理學古詩自河梁以暨六朝近體自神龍以迄五季靡不句追字琢心摹手追卓然名家

明詩別裁西原詩力追雅音故不落凡近語

田按君采詩長於擬古氣馥蘭苕音振瓊瑤其論詩云神韻爲勝才學次之又云清遠秀麗深服康樂可以識其意境矣戲成絕句云海內論詩伏兩雄一時倡和未爲公俊逸終憐何大復粗豪不解李空同薛之俊逸與何爲近宜其不許空同也

飛龍篇

晨登金壇神君所治芝草叢生玄泉泌泌乘彼飛龍以遨以戲憫我衰老乃告要秘周流神庭璧門十二授我神藥盛以玉笥教我服食長生久視優哉游哉壽等天地

江南弄

芙蓉嶼口茱萸潭朱脣一笑酒乍酣素裾並袂歌江南歌江南望江北思不見情無極

游俠篇

君不見翩翩游俠子虎變龍淪世叵測轉海摧山力無比君不見闔廬堂上養死客吳王酒酣客進炙千金七首匿魚腸俄頃蛟龍飛霹靂又不見夷門老翁屠肆兒陸沈大梁人豈知竊符奪將付公子秦人北

解邯鄲師。古來豪傑皆若人。意氣激昂肝膽真。傾軀寫心不自惜。排難解紛如有神。丈夫自是英雄者。左拉荆軻。右古冶。甯當刎頸臥道旁。誰能槁死蒿蘆下。君不見虞卿齷齪絕可憐。託身魏齊捐相權。平生著書萬言在。不如刺客三尺之龍泉。我今落魄復如此。放歌飲酒長安市。結客曾通滄海君。報讐欲借幽并士。酒闌擊劍歌莫哀。眼中豎子何有哉。明朝事就拂衣去。卻隨梅福觀蓬萊。

長信怨

異時陪玉輦。同載召蛾眉。寵極有衰歇。恩深多怨思。秋風吹網戶。春草被丹墀。不及主家伎。空歌團扇辭。

莫愁曲

儂家住石頭。綠水繞歌樓。不是工娛客。何緣字莫愁。

效阮公詠懷二首

窮漠萬餘里。海水周四隅。中原勒千乘。翱翔順風趨。白羽翩翩飛。一軍驚且呼。揚節下高闕。長纓繫單于。右行臨月窟。左旋出日區。立功何足矜。猛氣聊以舒。涼風起中林。槁葉落如埽。徘徊此何時。歲暮一何早。吾生隨物化。安得不枯槁。惆悵終日夕。延頸望雲島。榮名非所慕。神明可長保。手把三皇文。五嶽訪芝草。

擬郭弘農遊仙

瑤溪臨赤岸。曾潭揚素波。巨鯨冠蓬萊。玉堂映巖阿。中有羽衣客。陵岡拾若華。髣髴乘紫煙。縹緲吸翠霞。靈妃奏妙曲。六蚪駕雲車。西謁王母廬。東戲海童家。下視九垓內。蜉蝣良可嗟。

擬謝臨川遊山

徂節淹登臨。開歲促遊玩。陰崖雪猶積。陽溪冰始泮。遊帆憇絕壁。抗策陟窮岸。撫化雖未盈。卽事已可玩。幽谷風華媚。晴峰雲彩粲。尋異迹轉緬。覽勝景迭換。洲分島參錯。巖聚岫迴亂。丹梯架懸梁。石室構層館。初經洞穴底。乍出翠微半。羽人謝世運。靈景變昏旦。汗漫無冥筌。疏屬有塵絆。放懷聊自慰。含情爲誰歎。

冬初

開冬肇時序。時序異疇曩。烈烈嚴氣升。肅肅玄陰敞。同雲布阡陌。凝霜被榛莽。寒暑鑒迭代。休咎究消長。郊園值窮節。庭戶息羣響。疾病倦淹留。寤寐縱偃仰。感物殷懷抱。離人絕心賞。幽獨豈無悶。至樂非外獎。形變化隨逝。意愜神俱往。永解區中緣。安徘徊眞想。

候大駕回

西北收皇旅。東南歸帝京。山驪八駿下。海汎六龍行。後車環外區。前駟集神垆。支兵連四校。中堅屯九營。絳氣曳朱竿。青雲生翠旌。鏡歌綵吹激。行漏玉鸞鳴。入覲萬國至。清宮羣后迎。金貂雜流景。圭璧委繁星。錄功對五帝。合符朝百靈。俯窺地紐正。仰瞻天柱平。郊禋方展義。升封將告成。祈招美王度。長謠頌休明。

答何大復

宵懽不繼晨。朝游豈延夕。款念未云周。勞心彌已積。篤好追昔悰。興言撫今戚。纏綿金玉音。參差翰墨迹。開帙虛雲閣。臨觴闕瑤席。惠思荷來章。袞裳奉良覲。

答祝禮部

屏居寡懽愛。懷疴積悲戚。勞君惠繁翰。結言慰離析。荒楚向疏蕪。寒花方寂歷。良辰已云暮。清揚不可覲。舟行

朝辭枉渚汭。夕驚清川路。經過方自今。神期宛如故。沈吟招隱曲。徘徊遠游賦。西北有浮雲。行行一反顧。

首夏

寥寥塵外意。更對蕭然境。竹竦檀欒葉。雲起嵯峨影。迹幽疑避喧。神虛匪耽靜。嗒爾此端居。誰知晝方永。西郊

清曠自有素。甯獨在幽深。誰謂西郊地。宛似南山岑。四野多景色。青春晴復陰。鮮雲冠綠苑。回颿翔翠林。寢疾託閒逸。卽趣恣登臨。嬰累悼自昔。取適懽在今。豈嗟時易頽。但顧力難任。穿池玩遊儵。種木候鳴禽。將營人外賞。聊賦邱中吟。

郊居作

池籩鮮珍鱗。樊籠多鍛翮。物情忌窘束。人事傷紛迫。拙薄繆榮塗。疏慵謝朝籍。銷聲背諠競。息影投幽隙。邱園雖寂寞。悠然殊自適。徘徊弄文史。流連眷泉石。神輕片雲上。目瑩清川激。蓬嶠宛相聞。滄洲如在覲。未申隱淪志。稍習湛冥迹。外慕非所希。聊用終晨夕。

雜詩

富貴使心惑。嗜欲致行妨。宴安損性靈。美疾生膏肓。吾觀古來士。高躅互相望。首路或暫同。中道更蒼黃。班生嗣前烈。馬融遁遐方。藉梁奄爲累。附竇終自戕。通人識尙爾。咄咄可悲傷。

柏屏

何時別陵上。移居來後庭。牽條擬峰勢。總葉學山形。白雲轉自綠。綵雲相對青。無勞台嶺側。陵虛博翠屏。

邱中

蕭條風雨散。淒清松桂冷。邱中一游睇。處處雲霞影。稍愛夕陽佳。復聽秋聲靜。遙懷賞心侶。歲暮空延頸。

送劉子緯病歸

鄴下劉文學。成都漢長卿。淹留臥病意。瀟洒著書情。賓客頻頻去。風塵轉轉生。天涯雙淚眼。回首送君行。

送董侍御應期

同時多逐客。而我獨憐君。棄置勿復道。淒涼不可聞。風波一流落。江海遂離分。他日書相及。常因西北雲。

道院秋日海棠

偶來仙館內。花萼滿枝紅。彷彿看珠樹。玲瓏映藥宮。預傷白露下。坐惜綵雲空。躑躅攀條處。佳人不可同。

九日遊興隆寺

厭就騷人會。欣投釋子家。林風鳴貝葉。徑露溼金沙。宴坐依雙樹。清齋服九華。晚來歸客倦。欲借白牛車。

秋日溪上

何處窺秋色。舉舟入水隅。清波照鳧雁。寒露洗菰蒲。促迫悲生事。登臨快病軀。由來野人意。終日羨江湖。

晚過鄰叟

野外歲陰早。晚色正霏微。石蘭向風靡。海鶴犯霜飛。投策暫云憩。采苓方未歸。幽人已相候。隔水啓荆扉。

元夜諸公會不赴

九陌帝城中。煙花繞漢宮。銀河流夜月。火樹煖春風。衾枕憂如昨。軒車恨不同。時聞玉珂響。寂寞臥牆東。

泛舟

水口移舟入。煙中載酒行。渚花藏笑語。沙鳥亂歌聲。晚棹沿流急。春衣逐吹輕。江南采菱曲。回首重含情。

觀舞

妙伎出秦中。纖腰學楚宮。翠帷低舞燕。錦薦踏驚鴻。宛轉歌相似。嬋娟態不同。無因逃酒去。懊惱白頭翁。

寄題延陵吳長史山居

魏苑芙蓉沼。梁臺修竹園。徐陳遊上國。枚馬託名藩。歌賦從容地。追隨優渥言。病來謝賓客。歸去臥邱樊。巖穴仍招隱。風塵稍避喧。山疑七里瀨。水似武陵源。背渚排江閣。迎峰架石門。波瀾生枕席。彩翠落琴尊。鴻寶傳遺術。離騷念舊恩。秋風懷帝子。春草怨王孫。勝事幾人共。賞心千載存。相思隔雲外。桂樹屢攀翻。

對雨有懷

乍淡乍濃雲片片。半疏半密雨絲絲。林花落盡漸成子。巢燕飛來頻哺兒。坐對空尊應笑客。行騎羸馬欲尋誰。平生歡友俱南北。此日傷心獨詠詩。

遊盧巖歸月中紀興

雲林纔一曲。林屨已三休。遇可淹留處。應須緩緩遊。

城南梅開簡友人

郭外新梅樹。春風吹雨殘。未能攜酒出。幸爲折花看。

秋浦

秋浦多香草。當年怨楚臣。安知千載後。尙有廣騷人。

春日漫興

草芽半吐參差碧。花蘂初開淺淡紅。安得黃金高北斗。盡輸青帝買東風。

宮詞三首

禁園處處鎖名花。步障層層簇絳紗。斟酌君恩似春色。牡丹枝上獨繁華。  
閒倚闌干看柳條。可憐渾似董嬌嬈。東風何處吹桃李。空費心情學舞腰。  
紅袖低回拂錦茵。玉顏憔悴掩羅巾。空房獨對嬋娟月。賴是嫦娥不笑人。

擬仙詩

碧光衫子紺霞裙。月下輕風淡素雲。一曲參差吹未徹。海邊琪樹落紛紛。

王廷陳三十三首

廷陳字稚欽。黃岡人。正德丁丑進士。改庶吉士。授吏科給事中。諫南巡。杖譴裕州知州。尋下獄免歸。有夢澤集二十三卷。

四庫總目。廷陳少年高第。以恃才傲物。致放廢終身。其器量殊爲淺狹。至其詩意警語圓。軒然出俗。則不得不稱爲一時之秀。司勳集。夢澤集。樂府古詩。潘陸齊軌。下擬陰。何五七言律。沈杜比肩。參之盧駱。

藝苑卮言。王稚欽詩。如良馬走坂。美女舞竿。五言尤自長城。稚欽少爲文。頃刻便就。多奇氣。爲庶吉士。詩已有名。其意不可一世。僅推何景明。而好薛蕙。鄭善夫。以諫出知裕州。臺省監司。過州不出迎。相戒莫敢道裕州。而恨稚欽益甚。爲文致逮下獄。削秩歸。家居益自放。達官貴人來購文。好見者。稚欽多蓬首垢足。囚服應之。間衣紅紵窄衫。跨馬或騎牛。嘯歌田野間。人多望而



邊者晚節詩律尤精好縱倡樂有聞爭一首花月可憐春房櫳映玉人思繁纖指亂愁劇翠蛾顰授色歌頰變留寶態轉新曲終仍自敘家世本西秦又一書答人云綺席屢改伎倆雜陳絲肉競奏宮徵暗移羲和既逝關膏嗣輝逸興狎棕干霄薄雲禮廢罰弛履遺纒絕俱妙極形容可謂才子

國雅雅欽調高趣新頗多奇句如深谷絳變冷然幽響其少年行云金羈及狡兔珠繪落高鴻甲道士云海田猶有變洞壑豈無哀還蜀云峽束秋江怒雲盤石棧懸殆與高岑方軌矣

明詩選陳臥子曰雅欽爽俊故意警而調圓

靜志居詩話雅欽逸藻波騰雕文霞蔚音高秋竹色豔春蘭樂府古詩既多精詣五言近體亦是長城固已邈後凌前足稱才子

田按雅欽格矜復古意取標新亮節清音絳情麗製大約古體勝於近體五言勝於七言同由詣有專精亦是才分各限薛君采高蘇門亦復爾爾

### 煌煌京洛行

辭我故里來遊帝鄉誰云周道險踰羊腸解一車馬如雲意氣揚揚昔為奴虜今狎侯王解二伯兄乘軒仲父

鳴璫唱騶馳道徵歌教坊解三千金買劍百寶為裝風雷一擊星日回光解四朝探俠窟暮宿名倡酣呼六博

縱酒千場解五傾財結客隱罪匿亡名齊郭解人比孟嘗解六

田按此康陵時事雅欽擬古詩略無陳色

### 白紵辭二首

高堂邃宇施翠帷。蘭膏明燭散朱輝。二八接武步舒遲。被服姣麗光陸離。彈箏鳴瑟商羽移。喜溢歡恣不自持。轉盼含嬉屬所私。桑觴勸君君自知。主人既醉客不辭。燭滅纓絕珠履遺。朝露未晞夜霜零。衆芳凋歇鷓鴣鳴。逝者如斯不復停。人生百年命忽傾。爲君秉燭縱遊行。三星在戶參差明。騰觚飛爵何縱橫。垂羅映縠耀珠纓。衆中不言懷隱情。色授神馳流目成。士女雜坐交和歌。河轉參橫奈夜何。

雜謠

烏母謂烏子。弋人在傍汝勿唬。弋人得知將汝歸。我但高飛起。安能救汝爲。

名山藏。武宗將南巡。廷陳與同館汪應軫。江暉。曹嘉。舒芬。馬汝驥等。上書劾江彬罪。學士石瑤聞而止之。廷陳賦烏母謠。書翰林壁間。

少年行三首

幽并聞騎射。閭里藉輝光。朝遊從許史。夜宴挾姬姜。鳴鞭當大道。調瑟坐中堂。傍人爭借問。云是羽林郎。長安本俠窟。烈士多英風。殺人帝輦側。射獸上林中。金羈及狡兔。珠彈落高鴻。歸就博徒飲。酣歌意難窮。悲歌白日變。裂眦秋雲高。仇家諒不釋。怨吏幸無遭。全生脫虎口。獲死等鴻毛。豈效儒冠子。終歲濡柔毫。

子夜歌

共歡種梧桐。十載青雲齊。百年化雙鳳。來此樹上棲。

怨詩

隕葉春柯斷。株懷帶寒霰。靚溫陰巖希。霽頽魄慍玄。駛波僧逝。令德鮮終。良辰忽替。

湖上行

麗服出芳郊。香車臨綠水。留連天桃下。宛轉垂楊裏。妝憐草色鮮。坐逐花陰徙。相攜拾翠行。暫拉聽鶯止。忽驚玉珮遺。時將芳樹倚。紛紛遊冶兒。側目情無已。

詠懷六首

人生本殊方。神範各有宜。參錯匪一致。妄鑿乖天倪。鳧脛續則瘁。鶴脛截則悲。拇駢決則憂。指枝嚙則啼。黠劣不假益。羨溢甯俟虧。紛彼使嬖子。作意相追隨。智殫力云匱。成理曷能移。

民食美芻豢。鷓鴣甘臭陳。西子豈不都。魚鳥不見親。萬類殊所嗜。物豈慕非倫。箕畢各有好。況此世上羣。情欲孰爲正。參差何可均。黜智任自然。悠悠葆天真。

河清不可俟。川逝誰能止。朝露忌太陽。夕日愁濛汜。歌舞化塵埃。都邑生荆杞。大運厄陽九。銷毀固恆理。填海精衛勞。逐日夸父死。齊景悲牛山。晏嬰笑未已。彭殤孰短長。無生悟方始。

日月互天塗。照耀各有時。榮枯若循環。智巧難控持。賈生愁遇鵬。莊周憚爲犧。糾纏誰不嬰。文繡焉能辭。

放言用自慰。虛言誠我欺。得失來去間。北叟迺深知。

愚公亦非昧。智叟未爲得。獻疑親反噴。贊詭竦爲德。大人計億代。俗士愁日昃。通蔽鮮一致。損益非易測。茲歲忽云暮。駕言出城闔。楊林翳白日。岡岑蔽玄雲。荒原離獸馳。寒鳥鳴索羣。上有百尺臺。下有千古墳。登高一騁望。思我平生親。延佇久不至。俛仰懷酸辛。萬物靡不化。千載猶茲辰。驅馬復來旋。咏歌聊飲醇。

### 歲暮雜興

孔公深贊蠖。賈生虛忌鵬。屈伸在一時。憂喜本同域。河清豈能俟。途窮安足哭。久息漢陰機。莫問成都卜。

### 詠秋泛

鮮曦登首秋。緒風革闌暑。孤嶼濺驚湍。輕橈驚蒼渚。舉舟吟越人。鼓枻歌漁父。霜林隕葉揚。沙岸輕鷗舞。兼葭寒隱汀。芰荷衰映浦。披拂枉蚤緣。維繫乍延佇。羹芹翠縷翻。鱸鮓銀絲剖。俯睇怍虬潛。仰盼愧鴻舉。泛梗傷在今。乘桴豈獨古。

### 贈人

南塘偶儻士。薄宦向西陬。石竹臨江映。春雲抱峽流。徘徊去國日。浩蕩望鄉愁。莫厭卑棲地。三巴足壯遊。

### 送李子中養病歸

游颺傷人事。興衰感世情。虛傳授簡叟。無復抱關生。客散梁王苑。人耕宋帝城。行多懷古詠。一一寄同聲。

贈方子

鄰並復同調。過逢數舉杯。謝公興不淺。莊舄吟何哀。霞日赤城曉。雪濤滄海迴。何當共舟去。攜客訪蓬萊。

出獄後歸興

孤憤辭梁獄。高歌望楚鄉。煙花春沔鄂。樓閣畫瀟湘。弔古懷增慨。尋仙事頗荒。何如共漁父。一笑詠滄浪。

道中憩廢寺

寶地元虛寂。金仙合杳冥。空林沈紫翠。畫壁落丹青。羈旅暫投迹。殘僧一啓扃。迷方隨處是。含意訊山靈。

寄方思道

聞爾遊華頂。令予夢彩烟。戶庭羅峭壁。枕簟落飛泉。山有藏書穴。溪多送酒船。春江如有興。花裏到吳天。

湖泛

楚地饒洲渚。騷人戀芰荷。鷁舟張錦席。龍笛起滄波。鳥影隨檣影。漁歌入棹歌。前溪聞更好。欲進暮煙多。

送王知事還蜀

佐郡已三載。還家無一錢。苦心成白首。達命任皇天。峽束滄江怒。雲盤古棧懸。歸來揚子宅。寂寞守吾玄。

丁酉之夏觀文溪子於大江之濱與之述往感時命酒坐石揮涕而別太息成詩

愴爾離羣久。艱危更可傷。一麾堪白首。萬死出南荒。天入瀟湘闊。風驚鶴鶴揚。垂堂古有戒。去矣慎舟航。

聞箏

楚館名娃出。秦箏逸響傳。徘徊芳樹側。掩映雜花前。雁促玫瑰柱。鶯喧錦繡筵。年來哀怨切。復此感繁絃。  
閒步

卜築蒼巖畔。爲園碧水涯。浴童依淺瀨。浣女散晴沙。中散林惟竹。東陵圃是瓜。村頭歸欲暮。巾服映殘霞。  
寄韓道人

吾愛飛霞子。殮霞臥藥宮。時將黃綺曲。高詠紫芝風。洞草秋生細。壇龍晝護空。丹應九轉就。地與十洲通。  
玉樹扳何及。青牛望不窮。因君惠羽翰。自此脫樊籠。獨鶴冥冥去。相從碧海東。

遊西山作

西山憶昔宣皇幸。幸罷千巖御氣留。金界尙看金殿峙。玉泉長接玉溝流。君王水石遊人重。畿甸煙花賦客收。天上翠華無復度。五陵松柏迴含愁。

卽事

楚國村墟煙霧裏。春朝門巷薜蘿間。柳條到地可攬結。燕子定巢頻往還。新水潺湲遵故渚。歸雲縹渺戀家山。生涯甘傍漁樵侶。世事虛傳鷓鴣班。

病後客過有贈

病骨旬時虛酒筵。壯心激烈嗟暮年。秋堂過客擊柝後。寒渚哀鴻吹笛邊。尊罍當戶映初月。松桂傍人生夕煙。與君一醉緩世慮。深夜敢辭吾欲眠。

# 明詩紀事卷四

## 戊籤

### 華察二十二首

察字子潛。無錫人。嘉靖丙戌進士。選庶吉士。改戶部主事。歷兵部郎中。復改翰林。修撰。賜一品服。使朝鮮。尋罷歸。起原官。歷侍讀學士。掌南院事。有巖居稿八卷。

泰泉集。鴻山詩。追蹤陶。杜。卓然大雅。

遵巖集。華君詩。洒然自立於塵埜之表。意象超越。音奏淒清。若木居草茹。服食導鍊。淪隱聲迹者之所爲言。非世人語也。

藝苑卮言。華子潛詩。如磐石疏林。清溪短棹。雖在秋冬之際。不廢楓橘。

雙用卿雲岡稿。華子巖居稿。沖淡閒曠。如秋水芙蓉。不事雕飾。步驟陶。章。而得其自在。

明詩選。陳臥子曰。子潛清儉。似茅茨下人。

### 懷閔宮諭

伊昔託明義。盍簪從北扉。久要重南金。歲晚期同歸。如何鑠衆口。中路忽分違。鄙夫昧出處。達士能先幾。養疴識遵晦。戒寵知防微。嵯峨道場山。白雲朝夕飛。室遠人自邇。莫使音塵稀。



過煙水莊

垂楊陰平田。湖畔多菑畬。茫茫煙水中。結茆成隱居。閉門閉白日。密竹臨清渠。行隨溪上雲。倦枕牀頭書。客至時命酒。興來兼捕魚。願言託幽迹。卒歲同樵漁。

晚晴泛舟

載酒隨輕流。演漾情未已。夕陽映前川。棹入微茫裏。散髮弄煙波。竊比鴟夷子。沙際暝色來。歸楫還自理。何處滄浪歌。因之一洗耳。

送俞汝成遷紹興武守

一官謫南楚。三載始得遷。積薪豈足歎。養晦有固然。竭來佐會稽。境中秀山川。八月錢塘潮。送君江上船。靡宇倚絕巘。蒼翠生檐前。嵯峨越王臺。日夕空雲煙。臥治饒化理。登臨富詩篇。吾將探禹穴。藉此東道賢。澄觀樓曉坐。和僅初韻。

曉色澄秋林。霞明映山翠。貪奇事夙興。爽氣醒殘醉。空霜日夜繁。坐見木葉瘁。天高宿霧收。白雲出平地。初日照重巖。寒流響虛隧。景物清心魂。冷然起遐致。

雨後山園卽事和僅初韻

山色曉微霽。山鳩鳴不已。雨氣積重林。巖陰木生耳。荷鋤歷中園。開畦看新水。羣峰對草堂。白雲滿窗几。

因茲避世心。悟彼攝生理。萬物皆自然。至人貴無已。

過環谷草堂

采藥到仙家。白雲滿空谷。羣峰環四面。蒼翠常在目。一徑何透迤。頽垣見修竹。岩扉白日扃。隱几睡方熟。有時學灌畦。抱甕蔭喬木。悠悠林壑間。俯仰聊自足。

姚山人茶夢閣

山人恥獨醒。啜茗亦自醉。清風敞高閣。隱几頽然睡。平生之苦吟。冥想入寤寐。殷勤夢裏言。款曲詩中事。神超萬象融。意愜情景備。松陰泣山鬼。夜靜猿鳥避。天籟本希聲。筌蹠一何贅。悠悠池草心。千秋可同致。早春園居次僅初韻

寄尤郡博

樽散任吾真。幡然早乞身。不辭爲圃陋。聊給罷官貧。荷鍤初經雨。開畦正及春。猶憐聞道晚。應媿漢陰人。遙聞授經處。正對錢塘門。白鳥出還沒。青山朝復昏。家貧常自足。官拙詎須論。爲問相如賦。何年達帝闈。送施子羽謁選北上

巖屋

把酒那能別。江城落木初。鄉心繁客路。寒色上征車。旅食途將暮。人情交易疏。漢廷方重賦。誰爲薦相如。

鑿坏宛成室。偏側嵌危岡。花發洞門隱。雲生石几涼。隔巖通水氣。幽隙引晨光。豈是逃禪處。塵心已坐忘。

秋日閒居漫興和僅初韻

高齋著書暇。雲盡見諸峰。已卜青山宅。言追處士蹤。溪深度夕鳥。地靜聞疏鐘。蓬戶無人到。蒼苔一徑封。

芝谿詩爲蔣上舍作

自居鑾江上。迢遞憶吳關。棲鳥尋故處。歸雲懷舊山。春明紫芝秀。月照清谿閒。孰謂川途遠。神遊時往還。

送談同年轉台郡二守

浮雲本無繫。去住欲何爲。山郡興自僻。大夫官不卑。俸錢足酤酒。暇日但吟詩。莫入天台去。花深失路歧。

酌紅梅下和姚山人韻

巖梅發紅萼。獨樹明高林。春晝鳥鳴寂。雪晴山閣陰。鄉愁不入夢。歲序自驚心。對此生華髮。甯辭杯酒深。

秋初雨後同姚山人山行

空山秋雨霽。載酒一從君。林靜發清磬。潭虛生白雲。登臨聊適意。去住自爲羣。歸路溪橋晚。涼蟬噪夕曛。

荆溪曉發

挂席出溪口。微茫天漸明。殘星帶高樹。春水抱孤城。野曠月初沒。村深雞亂鳴。停舟問漁父。誰識濟川情。

山中和文壽承韻

林色晚來淨。秋聲雨後新。偶然松下坐。對此山中人。流水任去住。白雲忘主賓。安能向城市。終日勞吾形。  
送安郡倅還京口

離亭一悵望。春水渺孤舟。黃鳥啼津樹。青山對驛樓。恨添芳草色。夢繞大江流。爲問衡陽雁。何時過潤州。  
冬日送周上舍歸婁江

歲晏束書去。悠然返故園。爲文已自信。生事復何言。落葉藏深徑。疏梅帶遠村。離情不可極。寒日下荒原。  
贈彭孔加

聞說幽溪處。衡門委巷通。業存三徑僻。道在一經窮。霜葉墮虛牖。雲山隨短昂。坐憐華髮改。莫遣綠樽空。  
楊巍三十二首

巍字伯謙。海豐人。嘉靖丁未進士。除武進知縣。擢兵科給事中。出爲山西僉事。歷參議。副使。擢右僉都御史。巡撫宣府。改陝西。進右副都御史。移撫山西。入爲兵部侍郎。改吏部。以終養歸。起南戶部尙書。召爲工部尙書。改戶部。進吏部尙書。加太子太保。贈少保。有夢山存家詩稿八卷。

四庫總目。巍中歲學詩。與唐高適相類。而天分超卓。自然拔俗。故能不染埃壘。獨發清音。

海岳靈秀集。夢山詩。不事雕繪。旨趣天成。

鄒觀光孚如集。楊公詩。高曠玄遠。冲夷澹泊。河朔魏允中。擊節誦公晉中詩。燈前梳白髮。馬上夢青山。思沈而致遠。非唐人不

能道。

分甘餘話。吾郡楊太守夢山。五言冲古淡泊。在高子業。華子潛。季孟間。如遠道令人愁。況近單于壘。秋風入雁門。羽書日三至。微微霽景流。天壤色俱素。鄉心生塞草。世事入秋風。風雨樓煩國。關山李牧祠。閒將流水引。夢與古人居。雨響殘秋地。城分不夜天。古石苔生徧。泉香麝過餘。皆逼古作。

靜志居詩話。讀夢山詩。如水仙十囊。江梅一萼。嫣然薄冰殘雪之外。

田按夢山集。五律最勝。直擅右丞。文房勝境。餘子不足道也。自書存稿後。乃謂得於曹紀山。呂時臣爲多。雅抱冲襟。令人翛然意遠。

### 彈琴峽

瑤琴何處聞。停車空緬想。谷靜水聲幽。霜餘山氣朗。無聲心亦閒。況復聞清響。大道晦有時。靈物豈易賞。徘徊坐磐石。高歌動林莽。

### 馬谷山

馬谷近愚谷。所以人跡稀。昔名烏鴉山。不見烏鴉飛。惟有紫蕨菜。其苗高且肥。洞口封白雲。專待主人歸。

### 述懷

鯤鵬翔萬里。鷦鷯在一枝。大小各有適。進退豈無時。胡爲徇利祿。營營至死悲。榮公行帶索。陶氏恆苦饑。至性苟無累。貧賤復何辭。歸去臥山中。斯人良可師。

送黎樂溪憲副轉甘肅太僕

帷幄運籌者。翻令在牧芻。憂時雙鬢短。去路一琴孤。已振蘭臺紀。應蕃沙苑駒。誰云閑散地。天子欲平胡。

柏溪書屋

入夏門長閉。爲園道不疏。閒將流水引。夢與古人居。野鶴窺丸藥。山精聽讀書。尋詩自來往。風起柳塘初。

石州陷後作二首

石州古名郡。一日化爲灰。虜騎豈飛到。關門不戰開。腐儒終誤國。盛世自多材。好用廉頗輩。空談何補哉。自昔聞兵火。傷心在目前。生存猶墮淚。死去益堪憐。城壘酸風日。干戈積歲年。請纓還我輩。悔禍是皇天。

雁門九日無興登高作詩二首

九塞行將徧。三秋歲欲殘。故鄉歸未得。客抱向誰寬。雲送臺山暝。風吹關樹寒。干戈正擾攘。何處可凭欄。把酒不能醉。登高奈所思。豈堪雲斷處。正值雁回時。風雨樓煩國。關山李牧祠。寒花無意賞。況復鬢毛衰。

寓安邑

回首同戈路。忽驚歲序徂。腐儒慚餼廩。多病夢江湖。凍水寒雲合。條山夕照孤。荒涼城郭裏。惆悵禹王都。

過懸空寺

一寺空虛裏。危欄高幾層。懸崖惟度鳥。無路去齋僧。雲隱多羅樹。天垂寶月燈。塵心何處覺。孤磬下峻嶒。

路中逢立春

簫鼓迎春日。喧喧客裏聞。馬消邊地雪。旗煖晉山雲。隱隱川光動。微微柳色分。田園正好去。莫待有移文。

過石嶺關

石嶺月初上。登登僕從勞。山城秋路遠。戍鼓夜聲高。驅馬臨重隘。感時換二毛。風塵頻看劍。無夢向江皋。

贈車鎮村族叔三老

吾家養齋老。所性好清閑。薄地不盈頃。草房只數間。宅鄰廣武墓。樹接烏鴉山。已往郊原外。柴扉長日關。

郊居秋興

郊原淨秋色。幽事甚從容。不厭山僧過。每於田父逢。爲橋通野水。伐木出寒松。更願煙塵絕。時清一老農。

答王龍門見寄韻

自向山中臥。蕭條門徑秋。市沽愁不醉。藥品病多收。世事歸詩卷。生涯有釣舟。聞君欲相訪。家在海西樓。

月夜至山園

以我愛光景。山園夜亦過。微風醒鳥夢。明月澹煙蘿。露冷蛩聲少。亭空樹影多。此中得佳句。高詠向星河。

還家逢九日

芳辰來故國。秋色徧柴門。正值菊花候。新開竹葉尊。晴雲高雁鶩。暮雨長蘭蓀。偶誦閒居詠。斯人可共論。

重過馬谷山村

山村重到日。風景益堪親。家遠惟宜病。境幽豈避人。雲開三洞曉。水漫九河春。投老此中得。當年枉問津。送孫司訓之任良鄉學諭

幾載借荒城。爲師獨有名。那堪驅瘦馬。猶自戀諸生。月上蘆溝白。風傳黍谷清。莫言官尙冷。已得近神京。秋晚桃嶺再集

已過重陽日。風高寒更催。菊殘猶待客。病後尙登臺。萬木霜中落。浮雲天際來。祇應拚一醉。騎馬夜深回。題趙子冲玄稿

嗟君狂者流。一第竟悠悠。見客少青眼。吟詩欲白頭。谿山無世態。花鳥共春愁。從此聲名著。前身趙倚樓。過響水堡

塞水合流處。聲喧十里繁。乍聞堪動色。相對未能言。束峽鼉鼉怒。驚濤日月翻。祇應阻胡馬。不得入中原。早秋登龍門城樓

朔塞樓頻倚。新秋天乍晴。雲山兼日色。鼓角帶邊聲。路有元人轍。臺餘漢將名。楊公石柱在。極目舊開平。九日大同登高

已作雲中客。更登塞上臺。風塵回老眼。節序託深杯。碧海雁行斷。陰山雨氣來。故園今日菊。惆悵向誰開。



題龍門圖送溫侍御還朝

疊浪下危岑。誰言禹鑿深。羣龍鬪白日。客子發孤吟。怒損山川氣。愁關天地心。憑君爲砥柱。到海萬波沈。

遊大慧寺同李行人熹任計部鎧羅廷評節汪山人淵賦

花垂蘿洞口。樹滿碧雲層。對境疑爲夢。前身恐是僧。樓臺依北闕。經論有南能。卻恨相過晚。登臨意不勝。

宿小山望海寺

岩頭燈火起。幾處見僧房。蘿薜昏初夜。星河滿上方。人歸山店遠。磬入海天長。明日正東望。蓬萊接混茫。

酬紀山見寄韻

別離二十載。書到見交情。始信山居好。益憐詩韻清。花開宋玉宅。雲抱楚王城。何處思君切。秋高古北平。

宿凌雲寺二絕句

繫馬夕陽邊。山僧訝客至。門開古殿秋。云是凌雲寺。

野寺一僧住。朔風萬里來。虜營猶未徙。獵火照邊臺。

爲任柏溪題畫

萬壑縈迴一草亭。溪雲漠漠山青青。主人何處尋芝朮。留得松聲與客聽。

# 明詩紀事卷五

## 戊籤

皇甫冲八首

冲字子浚，長洲人。嘉靖戊子舉人。有華陽集六十卷。

藝苑卮言：太原兄弟俱擅菁華，吳中一時之秀，海內寡儔。

皇甫湜少玄集，吾兄因是子樂府，其劣於古者蓋鮮，觀其意直欲極詣以求乎至當，而不俯仰於世俗之談者。

司勳集：吾兄詩兼綜諸體之妙而不能稱之以一長，盡臻名家之奧而不能擬之以一子，此二陸辭藻獨秀於平原，三謝聲華莫先於康樂也。樂府雄深古選雅澹，歌行縱逸五言近體典麗絕句清婉，差弱者其七言近體乎。

國雅：吳中四皇甫盛稱才藻，宜嗣冉曾。

列朝詩集：子浚遊虞山，有紀遊詩，自爲之序，詞致甚美，其全集不傳。金陵張文寺曰：四甫之才，子浚爲冠，亦闡幽之論也。

靜志居詩話：四皇甫詩源出中唐，兼取材於潘、左、江、鮑、清、音、亮、節、淨、埽、垢、氛、高、蘇、門、華、鴻、山、楊、夢、山，而外無有及者。

明詩別裁：吳中詩品自高季迪、徐昌穀後，應推皇甫兄弟，以造詣古澹，無一點穢纖之習，時二黃三張空存名目耳。

田按：子浚詩五言與諸弟合轍，歌行獨得變風變雅遺意。子浚舟中讀楊兵部疏，詩云：誰讀楊公疏，聞之感慨生。無從得借劍。

空使欲沾纓，填獄人誰惜。投沙已獨清，須知直臣志。九死一毛輕，甲椒山之死，義憤勃發，乃弟司勳集中壽介谿序謝嚴相公。

分惠大官攢品，謁鈴薤書院，嚴公解相還豫章，追送淞陵諸詩，過於放翁之賦南園，在山出山之詠，能不於茲三歎。

築垣行

朝聞築外垣。畿甸紛縱橫。五城發閭庶。九營糾踐更。司徒庀餼糧。司馬量期程。司空度基址。板築戒時興。繚繞百餘里。周帀遮宸京。婦女喜往饁。童稚歡呼行。予前相勞苦。豈不愛此役。天子守四夷。何須問疆場。有臣居北門。可以謝西域。蒙恬築長城。猶謂秦無策。時詘乃舉嬴。徒爲智者惜。父老來告予。公但見其迹。請言前年秋。胡馬入塞來。兵環順義城。馬飲三河湄。關山豈不隘。如涉無人墟。壯士豈不猛。無敢當其威。六道召義勇。九門宿王師。胡虜晝殺人。夜火爇民居。火焰燒天雲。白骨盈溝渠。醜婦割乳飲。美者爲月支。橐駝滿千萬。寸鐵貴金珠。六鎮坐觀變。誰來衛王畿。選將盡執袴。點兵非鐵衣。邊懸本兵首。市暴中丞尸。元戎閉營臥。曾無一矢遺。或言召之來。聲勢相互持。虜去竊自慰。吾師殺其軀。取首作俘馘。□□奏彤墀。王民百萬戶。乃不如蓬藜。思之骨猶寒。安知勞與罷。吾將從王事。請子且勿嗤。回首謂其徒。胡虜已刷馬。築垣戒時成。朝夕慎勿惰。不記奔逃時。吾儕苦顛播。若子槩上盤。若妻馬前裸。有弟生不歸。有親死棄野。東家歎夫鰥。西室哭婦寡。爭門後者死。踰河疾者墮。舉畚堅下基。爲堞高著堞。一朝壞斯垣。誰來顧爾我。垣成詠惟甯。庶免兵燹禍。胡去開門行。胡來閉門坐。臣尹但畫諾。將軍幸安妥。且侍太乙祠。無問三邊火。

實錄嘉靖三十二年十月辛丑新築京師外城成。上命正陽門外門名永定。崇文外門名左安。宣武外門名右安。大通橋門名

廣渠。彰義街門名廣甯。

順義戰

鄰有順義人。告我庚戌事。八月月生魄。道傳俺達至。朝聞古北屯。暮見遼陽騎。李生正下帷。奮激報守吏。守吏不敢言。雙目但直視。馳馬歸赴敵。城門忽已閉。登城望家室。膏血乃塗地。里閭盡焚燒。妻子身首異。李生按劍怒。背裂聲色厲。詎惜中山羹。甘心河東棄。惜哉無一兵。不能爲之計。乃有陳使君。挺身獨不避。下令開四門。彎弓插兩幟。左書報仇文。右寫勤王字。當門據胡床。潛軍弛銜轡。李生與之俱。不覺增勇氣。胡虜來覘窺。一矢兩酋殪。胡驚齮齒奔。倉皇解圍去。城邑不破殘。凡以二子庇。功高主不知。事往名亦墜。李廣豈數奇。耿恭終棄置。斯理自古然。況乃居今世。請君勿復言。此事猶爲紀。

下邳

天曠川途遙。長楊繞墟陌。歸舫若飛蓬。飄飄挂輕席。圯水東流長。邳山暮雲白。爲儒四十年。哀然一縫掖。投筆緬幕中。爲問山中客。儻有墮履人。先雞待黃石。

七星檜三株猶存

停舟繫石岸。躡屩遵瑤壇。梁宮暮雨濕。蕭檜陰風寒。攬衣就拂拭。詭怪極偉觀。形分巨靈擘。影屈螭蚪蟠。上泖煙雲色。下蝕苔蘚斑。何須屬霄漢。偃蹇當層軒。代禪若反手。日月如飛翰。載記豈所覩。圖繪良工難。生者宛神理。摧者非靈殫。緬念封殖人。千載增長歎。

過濟甯懷周白川尙書

忽憶尙書思惘然。歸舟還過濟陽川。棠陰寂寞猶今日。楊柳依稀似往年。江上自吹懷舊笛。道傍誰問孝廉船。清尊獨對南城月。惟見歸鴉噪晚煙。

和子約弟帝京上元

走馬來逢帝里春。上元今夜物華新。萬家煙火明侵月。夾道香車暗起塵。穠李歌中喧笑語。簫韶聲裏豔陽人。更看天際神光起。道是西宮祀玉真。

西苑卽事

曉日曛曛照御堤。君王身在大庖西。雲邊鐘磬和仙樂。日下旂幢雜綵霓。侍從詔看玄鶴舞。中官敕賜紫駟嘶。長生殿上長明火。不數秦王祀寶雞。

渡淮

去國逢春春復過。歸舟四月渡淮河。岸當鬻處沙成漲。水到迴流漩作渦。直北煙塵看遠在。向南風氣覺暄多。八公叢桂今何似。欲就山中結薜蘿。

皇甫湜四十九首

湜字子安。沖弟。嘉靖壬辰進士。除工部主事。改禮部。歷員外。郎中。遷春坊司直。謫廣平通判。進南

刑部主事歷員外出爲浙江僉事有少玄集二十六卷外集十卷

四庫總目。李詩憲章。漢魏取材六朝。婉麗之詞。綿邈之神。以駿駕昌穀。蘇門固無愧色。

甫田集。子安雅性閒靖。慕玄晏先生所爲。自號少玄子。詩沈蔚偉麗。早歲規倣初唐。旋入魏晉。晚益玄造。鑄詞命意。直欲窺曹劉之奧。而及之。惜乎未見其止。皇甫冲華陽集。仲氏子安謂余曰。今之爲文者。王宋稱一代之宗。李何爲中興之冠。然王宋反元習之靡。而不能不病於聲。李何矯一時之弊。而不能不泥其迹。故於詩獨取迪功。子安刻勵二十餘年。其性敦靜簡默。又能致其深沈之思。其於詩鑄詞精而爲旨遠。體骨奇俊。辭彩英發。吾宗之有子安。則衣裳之冠冕。居室之棟梁矣。

司勳集。司直兄學臻博極。思覃深湛。余分則友于。義同師授。每有述造。輒相詔視。商榷砥獎。可得而言。方其家食含章。與徐生二黃。定交筆札。篤嗜工部。既何李篇出。病其谿徑。專意建安。至解巾登仕。與蔡王二行人。廣搜六代之詩。披味耽翫。稍回舊好。雅許昌穀。又與王文部。李司封。唐陳二編修。劇談開元天寶之盛。乃曰。詩雖選體。亦無使盡闕唐風也。故其詩特工五言。而七言近體。薄不經想。蓋錯綜魏晉。託宿唐英。幽玄以通思。春容以御氣。婉麗以陳詞。和易以達理。憤懣以抒情。綿暢以該事。雋永以歸趣。其始構也。隻字不愜於心。片言無豔於目。踟壁窮思。擁衾寤寐。曾不少休。今稿中或兩字未竄。或二語並存。致蓋密矣。藝苑卮言。子安之東覽。古選頗勝。子循之禪悽。近體爲佳。子安卒。蔡子木以詩哭之云。五字沈吟詩品絕。一官憔悴世途難。可謂實錄。又云。子安詩如玉盤露屑。清雅絕人。惜輕練短幅。不堪裁翦。

續吳先賢贊。皇甫兄弟。自相師友。湊對筮高第爲郎。尤爲昆季所推。貴溪相任宗伯時。所上章奏皆草之。或有故使他郎代。卽無以當其意。故太子司直坐法謫。又移按察浙。其在越詩曰。東覽最盛以五言名。

馮時可元成選集。皇甫湜九日詩。鷓鴣絃入怨柱。蟲響切離禍。楓落他鄉早。尊寒故國秋。又河虛平夕霧。閣掩澹秋塵。素霞昇逾靜。高雲歛更新。又新月詩。微暉不照綺。清漢欲生塵。雁山詩。遙靄引疏磬。羣峯寒暮天。四傑之概也。公負才傲睨。曾爲春坊司

直卒以纒廢。然郡中稱其人甚介。謂皇甫白眉。

明詩選。陳臥子曰。少玄疑思選調。意求雅則。惟取境不廣。無縱橫宕逸之致。

靜志居詩話。子安逸藻風飛。清文綺合。視子循工力悉敵。銖兩未分。宜子浚之難爲兄。而子約之難爲弟也。

明詩別裁。子安枕藉選體。故五言自高。然得風格而遺精理。未云詣極也。

田按。子安刻意摹擬。詞俊而格超。可謂鏤冰雕瓊。心手雙絕。

銅雀妓

帷牀棲累榭。椒鶴鎖深宮。花月常如昔。君王不可同。綺羅芳愛盡。臺館御遊空。惟有西陵樹。時時入望中。

春朝雪後

拂曙啓荒扉。雪照蘭林瑩。迴榭眺氛氳。層原閱彌互。春動鳥數聲。晴開煙一徑。欲訪垂綸人。悠然五湖興。

秋夜憶山中

悵茲豐景淪。感此流暉馳。青霄有翔隼。落蕊多寒枝。徒對盈樽酒。美人不共持。聊且娛心憂。華月泛金池。

意隨流波結。情逐孤雲移。猿鳴鶴以怨。歲暮何遠爲。

生朝述懷

修名悵未立。悲辰嗟屢遒。眺榭感徂川。芳華逝不留。淒露洒皋蘭。颯颯天氣秋。析析葉去榦。翻翻鳥赴儔。密雨垂檐駛。迴風繞隙流。臨此傷年髮。曾是戀恩猷。且當投絨去。桂樹山之幽。

歲暮述懷

崇情系淵邱。遠迹愧朝闕。自予結華綬。於今垂素髮。風樹斂寒皋。霜鐘流哀月。乘此菽蕭悲。彌傷芝蕙歇。  
雜詩

玄駟逾虛轍。青旂肅盈軌。時暘耀林端。餘寒散巖趾。乘化皆良游。登瞰春原美。翩翩翔霄鸞。矯翰憑雲起。思慕遺榮客。曠襟有如此。疇昔慨斯言。風塵淹暮齒。密親庶來同。韓鄂邱園裏。

和子約弟新霽閒適

中林散微雨。開軒眺晚晴。山原一綺麗。虹日兩輝明。長槐交戶蔭。新渠出水生。開襟玩來藻。延佇有餘清。豈伊西陵獻。獨得啓予情。

往視城南別業同子循弟作

赤嶠倦征軺。滄江遂還策。調笑掩竹書。行吟事泉石。芊綿東溪樹。迤邐南城陌。榛蕪獨懷往。堂構仍慨昔。不見禾黍秋。但逢麀兔迹。沼近伍胥臺。市遠梅生宅。遙觀經始期。歲月殊復易。焚枯進深酌。煙華靄將夕。攜手遡歸雲。惆悵平津客。

春日隱居二首

從宦蹇無成。竭來務田畝。悟身一虛幻。萬事夫何有。昭曠始自茲。逍遙眇長阜。遠墟絕行塵。東風搖谷口。



薜荔靄清川。雲霞生敝牖。隱几忘吾言。嗒焉喪其偶。  
崇蘭茂北谷。鮮藻榮南津。摘蘭間雜佩。采藻羞嘉賓。攜手登晴隴。舒嘯懷先民。潁陽有清波。畏壘有清塵。  
朝陽爛五雲。光照岩壑新。且當放歌去。聊用全吾真。

春日閒賦

驚暉慕屢生。淪華懼易失。獨往終可期。徒然嘆衰疾。澤徑茲翳茂。林園趣非一。芳雲起崇朝。諸峯乘望出。  
初泉乍交戶。新花尤映室。覽物寡嬰慮。幽居親道術。邴生游或似。尙子願未畢。寄謝山中人。無使淹蕙日。  
子木見過伏枕弗對述簡

贈閒上人

塔草含薄滋。庭花罷餘蔭。林淨夕迎霜。天長朝送雁。思君一水隔。跋予三秋眷。馳暉杳莫攀。歸雲時可見。  
東林禪誦地。寰中闕靈壤。蘿徑罕人蹤。泉竹諧幽賞。朗公法門秀。超迹絕煩想。皓月窺淨心。明霞鑒空象。  
虛薄匪世姿。胡然久塵鞅。領茲析冥論。永言欣獨往。

下西店遊目健跳海渚匯潮環山雲濤華勝

修坂無輟輪。孤征寄塵鞅。客心忽昭洗。巒林納澄養。蓬萊幾清淺。靈潮閱何廣。伊予一壑觀。從知百川長。  
煙黛縟峯華。雪錦涵濤滉。春合滄波深。晴搖翠微上。茲言采秀行。兼值乘桴往。達生趣旣秉。齊物理尤朗。

東方傲旅遊。西笑非情賞。

雨宿桐巖嶺

朝馳碧澗隈。夕到翠微裏。揚炬歷危岑。披林息塵軌。半空霧雨交。衆壑風泉委。清耳不避暄。瑩心自爲美。乘牘向雲蘿。問俗攜琴史。滄洲非滯滯。冥翰尋當理。

登雲峯最高頂

稍聞翠微鐘。猶自厭城郭。復躡丹梯霞。所見惟峯壑。步趾窺蓬瀛。舉身向寥廓。斜日挂危龕。非煙開化閣。翔鹿登素雲。冥苔繡瓊嶽。鞅掌懷仙蹤。信宿春華落。靈區事遙踐。海嶠果幽諾。伊予期會人。聿來遊鸞鶴。

踰盤嶺觀石門潭

總駕踰盤嶺。探奇自茲始。禽木非曩觀。岑泉愕今擬。來觀石潭勝。乃知巖瀨鄙。渟泓瑩靈碧。錦礫耀蘭浹。輕漣不暎雲。冷風緣硤起。春生滄海外。霞散綠蘿裏。客心在澄瀾。豈但濯纓美。

入舟

停策厭霖潦。登臚美雲樹。輕飄自遠集。川色靄已暮。澄瀾含霞彩。遙洲泛秋素。頗協倦遊情。殊深隱淪慕。從來困弱植。拊志慚遠度。時會苟難并。操持不易固。放斥金河居。眷戀玉門鵞。幽桂日夜零。悵望江海路。邈哉袁生室。忝此千載晤。

夕泛遣思

開秋兆徂節。汨吾旅川陽。臨此秋氣悲。旅魂滋洋洋。何況隔心賞。徘徊眷河梁。感別念有緒。指途憂無方。汀渚屢迴復。風濤增慨慷。兩鄉日予歧。一葦思誰杭。微月挂石壁。萍草亂寒塘。翳翳雲去岫。塗塗露委芳。淥水沿北舲。朱華嬉南橋。聊自知魚樂。江湖永相忘。

之崑邑道中書懷

迫歲物務勞。念此近郊客。趨塗無百里。江城望來隔。三年謝旅遊。登臚悵疇昔。旣感道路艱。復嘆時序易。川葦夾岸鳴。湍浪乘風逆。微微散林旭。泛泛隨波翻。眷言濁酒尊。誰遣他鄉夕。予方畏簡書。春陽事行役。湖泛

我行踰孟冬。風湍日云滯。聿來泝淮甸。還途指江裔。暮鷲散長蕪。遊目盡湖勢。蒼茫寒葭外。浩瀆白雲際。棲鳥去人煙。驚鳧下漁柵。行行忽超遠。望望更前詣。天色隱鴻濛。潮湍失空霽。客念坐纏綿。臨泛泊無繫。適國情已遠。歸田事仍戾。永言期滄洲。拂衣自茲逝。

桐巖曉發

厲澗越南岑。拂霧趨東士。宿處惟蒼煙。遙天徑如縷。林光曙鳥散。海氣寒雲聚。憫勞感婦歎。搖搖涉春雨。發郡城之天台道中述所經覽寄孔謝二憲副趙何二僉憲同年

委羽周遐討。飛流更幽悰。林羅踐已深。巖巒去彌重。綠雲迴幽溪。紫煙蔚奇峯。霞摛金潭藻。雨濯春山容。但聞松泉音。不見鸞鶴蹤。當同羽化客。海上期遊從。

觀石梁夜宿萬年寺述遊寄伯氏子循子約三弟周山人

微生不偶世。孤拙恆自將。徒欽楚老喻。載履越人鄉。五辭念乖怛。一往形瘵傷。春山填委暇。乘日事遊翔。夕棲鸞霞陰。旦發桐栢陽。既弄石潭月。復掇瓊臺芳。雙闕轉天徑。萬嶺鬱蒼蒼。鳳侶時髣髴。花苔深紫房。徘徊送落日。上下窺飛梁。緬懷同襟懿。暮色含悲涼。絕冥良已遂。心賞何由忘。愁思雲關客。聞猿清夜長。

贈施比部四詠

孤雲正棲峴。閒月始登嶠。綠苔席餘尊。金風吐仙調。客有緱山姿。靜聞天聲妙。萬壑皆能吟。甯假蘇門嘯。  
峴山鐵笛

山尊不雕飾。鴻濛契予情。逃樊託深好。遊古遺榮名。神將餐霞澹。思與颯泉清。頽然視萬物。何啻如流萍。  
窪尊醉客

連山對澄磯。輕漣發幽賞。緬懷任公釣。悠然范生槳。花源互窈窕。雲波彌滉漾。試問五陵豪。何如雙溪長。  
若雪漁長

蘭橈去悠悠。碧浪何瀾瀾。嘯傲天影中。徘徊月明裏。望隨蒹葭盡。興逐鷗鳧起。余亦倦塵纓。從君問煙水。

蘭碧浪舟

早春雪後看雨

雪罷清江曙。春隨細雨來。郊西好風景。柳色半樓臺。散漫兼空淨。芳菲觸處催。行雲自無意。怪得潤莓苔。

高杜諸君同集

曲徑雲深處。幽窗雨過時。村墟隨地僻。花鳥怨春遲。綠酒追朋好。青山隔夢思。開襟對公子。高興戀佳期。

夏夕雨後命酌同周子伯氏叔氏得頭字

暝陰淨窗竹。池上雨初收。坐覺寒泉瑩。仍憐芳杜幽。故人與斟酌。清夜愛淹留。應附三何躅。雲門可白頭。

集談氏園亭

幽興偕仙步。名園集綺辰。檀欒題賦客。巾拂舞花人。落日臨池好。行雲繞坐新。黃昏催秉燭。更益畫堂春。

昭慶寺翠筠禪房同孔學憲

城樓隔深竹。龍象宛湖隄。況復蒼蹊暮。閒聞幽鳥嘯。情知多惠好。靈境數招攜。惆悵寒山路。雲關處處迷。

林居晚興

歸來滄海畔。非復戀人羣。獨樹晚成適。疏花寒共芬。南山平入牖。西澗靜流雲。且對一杯酒。誰能迷世氛。

卜築

卜築向何處。閒吟在澗詩。自來迷歲月。直是偶心期。白鳥分磯石。寒山共酒卮。一行歸蓮勺。那復有塵羈。  
錢朱包三子過集賦贈

能賦三君手。爭雄綵筆詩。風雲難遽料。今古一長悲。秉燭宵仍遣。當歌興暫隨。並看憔悴者。敷藻盡吾師。  
橫塘晚興

郭外有幽棲。閒情泝碧溪。湖山相映發。鷗鳥日招攜。霞色浮塘上。鐘聲過水西。歸來一邱壑。源路使人迷。  
湖上作

芳章已被徑。初陽仍滿津。緬懷滄洲趣。獨往雲蘿春。鷗鳥宛如故。烟霞時復新。暝延南湖月。身意同清真。  
治平寺

風中到香界。獨往意泠然。步引花木亂。坐看洲島連。一林寄空水。滿院生雲煙。正此化心寂。鐘聲松外傳。  
修和觀

桃溪隔隱處。淡淡春波生。乘日候煙駕。有時聞鶴鳴。山來香閣徧。雲下石床平。永願啓金鑰。齋心朝玉清。  
題朝天宮東麓亭

尋幽歷華苑。緱嶺忽茲逢。行引泠風入。言將青鳥從。花明石道雨。春靄雲溪鐘。數到陸沈客。如何迷去蹤。  
吳山人留宿靈谷禪房

松門下迴策。杳靄鐘聲隨。卻望東林路。懷君獨往時。歸禽白雲盡。殘日翠微滋。惆悵烟蘿夕。清風不可期。

宿雁山靈巖寺

寥寥到真境。宿處傍風泉。遙靄引疏磬。羣峯寒暮天。白雲滄洲賞。清夜石門禪。卻笑桃源客。空從蕙路旋。

石梁

來尋方廣寺。石壁路中分。合澗飛丹壑。春蘿挂碧雲。苔梯徒屢踐。芝客信難羣。不見花前女。空音時復聞。

登弘濟寺閣別謝施侯蔡四省友

高閣橫江出。凌空石道行。朋遊謝城郭。幽意靄山楹。斷壑晴雲滿。長蕪夕鳥平。迴波對延佇。一遣別離情。

將至東昌

前瞻博平郡。雲渚蕩清暉。晨風一何鷓。秋鴻稍欲微。今日他鄉酒。思共故人揮。獨有空林葉。蕭蕭滿岸飛。

舟還使風

宵來苦湍浪。晨喜逐風行。獨此揚帆去。遙隨飛鳥征。望雲疑岸駛。出浦覺船輕。卻笑淹留客。元知不共情。

懷吳客部以容

故人吳季子。起草仙臺端。蘭省碧雲外。瓊枝何日看。江銜遠空盡。月帶疏煙寒。芳歲一爲別。夢來秋草殘。

同子循初秋雨後懷虎山橋

同君別山寺。心每懷滄洲。山館對新霽。烟虹開遠流。空歌碧雲暮。悵望石梁遊。況復西津月。蕭蕭此夜秋。

皇甫沆三十五首

沆字子循。淳弟。嘉靖己丑進士。除工部主事。歷員外郎中。謫黃州推官。召爲南吏部郎中。謫開州同知。改處州。遷雲南按察僉事。有司勳集六十卷。慶歷集二十卷。

馮時可兩航雜錄。皇甫子循詩名。與王元美相累。吳下能詩者。朝子循而夕元美。或問其優劣。周道甫曰。子循如齊魯。變可至道。元美如秦楚。強遂稱王。

王世貞弇州史料。子循五言律最工。七言次之。有錢劉風調。

四友齋叢說。近時皇甫百泉解頤新語。不但文字藻麗。而銓品亦精確。可爲詩家指南。

詩藏。皇甫子循以六朝語入中唐調。而清空無迹。楊用修以六朝語作初唐調。而雕繪滿前。故知詩有別才。學貴善用。

明詩選。宋轅文曰。子循望過子安。而其實不逮。

靜志居詩話。百泉清音藻思。五言整於小謝。五律儻於中唐。清真朗潤。妙絕時人。

田按。子循五律。清裁雅調。自是一時之後。五古亦是當家。至模範魏晉。鎔鑄齊梁。於子安稍遜一籌。

臨高臺

高臺望不極。臨竚意何窮。茂苑花爲苑。吳宮錦作宮。管絃虛夜月。羅綺罷春風。獨惜烏嗁處。猶聞曲怨中。

折楊柳

不見隋隄柳。長條大道間。絲陰流水去。帶影逐春妍。妬眉銷翠黛。聽笛損朱顏。日暮行人盡。思君可重攀。



擬中婦織流黃

金閨方永夜。翠袖理殘機。燈花斜落鏡。月光低鑿幃。寸心共絲斷。雙淚與梭揮。作伴除蛩響。驚眠惟雁飛。織就當窗素。裁爲遠道衣。從今芳訊達。不及早旋歸。

空梁落燕泥

金閨春色早。玉關芳信賒。人歸翻後燕。淚盡每先花。戶暗香泥積。梁低舞影斜。不作雙飛去。東鄰王謝家。

春日遊西山作

吳鄉信云美。山水饒嘉麗。疊巘表參差。層巒隱虧蔽。時惟二月芳。雨散千門霽。蕙晚蕩雲滋。蘭皋屏氛翳。獨攜邱中琴。言鼓江上柵。結友遵巖阿。尋僧指林際。仰看衆鳥翔。俛悅儵魚逝。物理相因依。余蹤且留滯。天界寺贈半峯上人

顧省紛俗嬰。尋山愜幽趣。秋水淨金河。寒雲翳珠樹。了看花落時。莫辨鳥還處。休公別來詩。江生擬將賦。雨過高座寺

積雨黯花邱。緣雲入香界。修策振林間。疏鐘落峯外。康樂誦阿含。陳思演清嘏。欲除常戀牽。惟是逃虛快。雪日寄王戶曹湖上官舍

初雪度江城。殘雲來省閣。覽物嗟歲殫。懷人悵居索。擇木本同棲。傾枝猶異託。維舟安可從。開尊自成酌。

移官越中初返家園奉答伯兄虞山見寄

薄遊逗京邑。獨往眷長林。始奉越鄉役。因愜故山尋。曠茲二載別。良晤展斯今。誰謂百里間。猶自邈徽音。未結邱中賞。先枉池上吟。睇燕悲稍戢。懷荆慨以深。花源迴俗轍。蘿逕斷塵簪。且駐稽東駕。雲扉期此心。

盛二仲交示廣志賦因贈

江左本多奇。盛生稱獨秀。速化有性靈。棲玄謝塵垢。披帙十行俱。擁衾萬言就。揖手青門東。醉心在良觀。廣志擬雕蟲。織書臻古籀。情同呼霓餘。興是凌雲後。愧匪辨璧資。相邀出金奏。

雨懷盛二時在清聽齋中

支齋營八關。陶情緬三徑。嗟我裘羊徒。悵此琴尊興。室邇心獨遐。城嚴迹難并。卮言誰與談。籥理自相證。細雨忽成寒。輕霏坐生暝。天風迴海潮。秋聲送清聽。

郡齋作

雅志懷山棲。復得理山郡。蒼岫入南楹。白雲帶西徑。雖事簿領勞。時與烟霞并。心曠眺既遐。迹沈尋亦近。下車芳載徂。牽牒明兩迅。仁靜樂有餘。拙遲澹無競。命藻酬清暉。濡毫愧靈運。

聞郡檄至簡子約

同時參外庭。一朝謝朝列。鍛羽非難馴。所驚峻網設。逸足晞高驥。聊以就羈紲。予季廟廊姿。爲邦茂時哲。

及暮宣令猷。何暮佇來轍。承檄懼有愆。趨裝悵無悅。曾是東山情。薄茲西河烈。芳歲若電馳。隆休亦飄瞥。翹首關路長。寸心念將別。

春日懷子安兄

恭承東省拜。悵望北辰遙。香寢分宵直。花天散早朝。吏情春更逸。詩興日應饒。空有雙鳧舄。無因渡玉橋。

渡衛

問水知臻衛。揚帆此渡河。清秋常細雨。落日更蒼波。言采芙蓉佩。情忘鷗鳥過。江千有舟楫。歸興獨如何。

同陳給事林尙寶遊毘陵胡舍人園

竝是仙舟下。因成金谷遊。亭開一水曲。山隱百花幽。繁圃春常駐。晴尊雨更留。那知龍臥意。猶繞鳳池頭。

親友道余至京口擬登金山餞別值雨不果

雲將孤鳥翳。雨阻一江分。竟日嵐猶濕。終宵汐並聞。遊心飛浩渺。望眼入氤氳。莫恨登臨晚。晴時是別君。

懷楚中舊僚張子時遷東昌尉

牢落同爲郡。飄飛最憶君。離尊郢門雪。歸馬漢城雲。道路情難極。星霜歲易分。心如洞庭葉。秋晚只紛紛。

道中寄憶衲子大林

歲晚東林樹。淮南落木同。齋虛玄度月。江倚惠連風。塵劫看爲累。榮名悟是空。歸期殊未得。持此報休公。

送陳子知杭州

東省含香吏。南邦佩印臣。離心治城月。別路武林春。碧水移蘭舸。青山擁畫輪。岳王遺寢在。拜手薦江蘋。

觀音閣同比部諸君餞別家兄

躋險因慈閣。憑虛託化城。江山一以眺。雲樹總含情。鐘外潮聲盡。尊前花雨輕。迴波去無限。應是旅愁生。

安隱寺

人天卽此路。花雨見空臺。刹盡南朝建。經多西土來。碑荒殘蘚合。僧定野棠開。了悟身如幻。何須訪劫灰。

上巳日同友人集大甯寺得幽字

帝里冠裳集。禪堂禊事修。人天春駐景。花竹暝通幽。香積開芳宴。金河引曲流。誰云王逸少。陳迹獨千秋。

秋夜集李守衙齋

政閒庭每寂。吏散日猶曛。下榻生秋思。傳杯語夜分。暗花微泣露。織月淨開雲。失路聊相倚。何期御李君。

邯鄲道

邯鄲臨古道。車馬此通津。錦瑟空埋恨。緇衣易染塵。王昌非蕩子。趙女是才人。迸逐漳流盡。荒臺蔓草春。

白雲山

青山行處盡。始覺白雲深。錫化無僧在。鐘鳴有客尋。花溪遙隱壑。蘿徑曲通林。坐得浮生理。悠然忘我心。

東溪寺

東溪斜帶郭。數里接仙源。嵐氣迴盤嶺。灘聲到石門。僧開翠微舍。客造白雲軒。訝可無機事。看鷗代晤言。

登赤壁

萬古滄江上。清秋赤壁開。浴鳧知舊渚。橫鶴見新臺。妙齒瑜非昔。雄心操已灰。媿無題賦手。猶欲記重來。

哭姪阿乘

長魚疲侍疾。季琰妙通禪。毀性安疏節。無生得大年。松邱成異代。花徑隔重泉。一見西河泣。誰能不泫然。

詠扇

吳繭新傳製。齊紈舊得名。塵來聊障面。歌罷尚持情。學月何曾滿。懷風不奈輕。莫須逢內史。價始重稽城。

關索嶺

斲石微通路。攢峯儼作關。雲中馬嘶去。天上鳥飛還。水向盤江匯。坡從香樹攀。平生慣履險。於此亦摧顏。

寄雲谷上人

棲霞信靈境。滅迹企前規。松覆梁王宇。苔荒江總碑。鱸歸秋興後。猿定夜禪時。怨別心千里。惟應江水知。

贈嚴叟

聞有君平隱。湖山不易逢。溪藏幽處隴。雲合曉來峯。嘯鳥閒中興。馴鷗物外踪。尋君迷九曲。花樹一重重。

鄱陽

鄱口曉來望，潯陽路此通。頽波銷霸業，蔓草沒王宮。霧色香爐上，秋聲瀑布中。禪心與遊思，并落楓林東。

惠山簡汪沛

閉戶沈冥久，尋山感慨生。靈泉常淨色，空梵亦秋聲。花雨行間濕，松陰坐處清。不逢雷處士，臨眺獨含情。

皇甫濂九首

濂字子約，一字道隆。冲弟。嘉靖甲辰進士。除工部主事，謫河南布政理問，遷興化同知。有水部集二十卷。

司勳集。子約詩每出闢曠，彌覺冲逸，兼好綠華紫清之章，貝葉珠林之偈。景純振響於仙遊，摩詰據懷於禪寂，興到斯成，曾無造次應酬之語。

松韻堂集。水部詩清窈罕儷，其志意亦復玄曠，故其文乃爾。

黃德水國華集。水部詩意玄詞雅，律細調清，長於造景，務在幽絕。山藏水闕，披露良多。

明詩選。宋轅文曰：子約盛有才名，其詩頗傷浮急。

靜志居詩話。蔡子木哭子安詩云：五字沈吟詩品絕，一官憔悴世途難。李于鱗送子循詩云：吳下詩名諸弟少，天涯宦迹左遷多。子約宦亦不達，與諸兄同詩稍不逮也。

田按：子約詩步趨晉宋盛唐，善於言情，讀之令人增骨肉之重，近體微傷局促。

王甥至傳家兄信感賦

昔我別都門。與子成東西。蔓草一爲惜。柔楊三綠萋。今爾客南冠。猶沾故國泥。再歎浮迹言。因傷中道睽。爲我說余兄。低眉曠雲霓。能不摧人心。喟焉鄉思迷。生世苦結束。悵邈青山蹊。

彭澤

重江轉溪綠。疊嶂敷林滋。山色信茲美。清風播休時。弦歌薄從宦。景物聊所宜。遐想歸來晚。何勞束帶爲。以子獨往意。兼此形役悲。飛鳥征途外。浮雲空我思。有情依澤柳。結念在江籬。愧彼栖遲者。猶懷三徑資。

悼子乘

冥冥雨露集。熙熙歲始更。靈蠢各有化。人理獨無生。念我泉下子。一絕如朝榮。生男以待終。胡爲遭天塋。情塵布虛室。寒晦凝軒屏。流目無存影。涕淚交霑纓。恫懷何能已。歎息每遺聲。堂闈曠綦迹。詩書空復盈。奚但腸九迴。心膂成頽崩。媿乏延陵達。無乃傷我明。

列朝詩集吳中先輩盛稱水部悼子不減安仁悼亡能敘悲怨。

眞州留別華陽兄

河梁意不盡。相送到眞州。歲月成今別。江山是昔遊。各言衰鬢客。那忍故園秋。明發東西恨。惟看一水流。

百泉兄同過虎邱如山僧院

春中微雨後。卉木散華滋。況是東林近。偏宜吟臥時。水煙閒鳥下。山靄夕雲遲。何必招蓮社。相攜就遠師。

偶過吳江訪子新

一徑翛然臥。何如仲蔚廬。蘿煙棲枕簟。湖月入階除。靜有名山思。閒惟老氏書。平生尊酒意。重對夜窗虛。

登懷庾樓

一作江陵客。長懷庾子山。林陂美相映。雲樹獨來攀。恩禮湘東舊。才名鄴下還。子規花外語。愁思入鄉關。

柳枝詞

韶華回首悵離宮。梁苑隋堤荒草中。獨有江邊楊柳色。垂垂還是怨春風。

潘岳宅

寂寂閒居弔昔人。芳臺修閣總遺塵。洛陽花態渾無數。空作荒郊一段春。





# 明詩紀事卷六

## 戊籤

### 頓銳二十四首

銳字叔養涿州人正德辛未進士除高瀋知縣入爲戶部主事改代府右長史有鷗汀長古集二卷前集二卷別集二卷續集一卷漁嘯集二卷頓詩一卷

列朝詩集北人云涿郡有才一石人得其二銳得其八

田按叔養古詩微嫌冗長竹垞所評良然至五律音節高亮隊仗鮮明七言律絕亦復翩翩振響在正嘉之際不失爲第二流

### 隴頭流水

隴水清且深東西南北下千里不見人胡兒來飲馬

### 長安有狹邪行

長安有狹邪馳道相背開宛轉近曲江詰曲臨章臺曲江何透池章臺亦崔嵬越陌植長楊夾路列高槐  
縈回少城隩盤礴新宮隈雕輪結黃霧華轂飛紅埃前載旣已償後車還復來要途生坎窞趨競亦愚哉  
三誦覆車言浩嘆令心哀

蜀道難

孤雲兩角去天咫。三峽雙流與鬼鄰。翻載覆舟道相屬。不聞一日斷行人。

雲居寺

地偏疏過從。寺僻愜招尋。風雨吟山鬼。松杉上水禽。壞壇蒼蘚合。廢殿白雲深。向晚聞煙磬。空冷宿客心。

虹蘿巖

絕壁臨千尺。懸崖結數椽。巖虛回梵唄。霧重合炊煙。僧定猿聲上。人行鳥道邊。談空歸未得。留宿愧無緣。

巖頭寺宿

山行三十里。路過百千峯。縹緲巖頭寺。微茫天際鐘。澗風吹短鬢。嵐氣濕長松。問我今宵宿。雲煙定幾重。

昭烈樓桑廟

芒碭收雲氣。樓桑掩日華。廟庭諸帝後。簫鼓萬人家。龍豈池中物。雄慚井底蛙。西陵銅雀去。無樹可棲鴉。

逃禪室

書帙經年廢。禪因竟日聞。地非緣客埽。香許對僧焚。禿塵空談豎。清齋佛粥分。病來休萬事。不是故離羣。

慈光寺

慈光開淨域。沙界出恆河。花雨阿蘭若。鈴風宰堵波。羣山空色相。一徑入松蘿。僧衲翻經字。雙林寫貝多。

潭柘寺

潭柘前唐寺。名山碧殿開。松高雲影亂。竹密雨聲來。吸澗龍歸鉢。銜花鳥集臺。數碑勒塵蹟。文字半莓苔。

西禪寺

禪意西來遠。空門東里深。松蘿開一徑。龍象護雙林。燄燄曇花色。泠泠梵磬音。片雲間過寺。如我本無心。

北園書所見

治產無千畝。爲園僅數弓。荒城足寒日。古堠易秋風。佛塔高雲白。邊樓晚葉紅。灌畦甘抱甕。轉地罷飄蓬。

春日宿長楊寺

長楊隱殘照。蘭若暮鐘時。靜得禪中味。閒題壁上詩。園蔬青雨甲。烟柳綠風絲。一宿聞清梵。三生本不期。

顯靈宮

星月浮璇闕。雲雷繞絳宮。虬軒開顯氣。鶴馭下罡風。道演濠梁叟。經傳河上公。鼎封龍虎伏。萬境寂寥中。

新春訪成長老方丈

霄漢千尋塔。香雲十笏房。金燈明廣殿。瓊唄靜長廊。花放優曇色。珠含舍利光。遠公開社地。戒行服諸方。

山行逸興

葛屨行山徑。筇杖度石門。鷲峯天外寺。蛤嶼水邊村。紅葉疏林影。丹崖挂瀑痕。炊煙生碧嶠。嶺月閣黃昏。

對竹

何處山泉落石灘。虛檐十箇瘦琅玕。鳳翎搖影三更月。鶴膝敲風一夏寒。深謝年年伴幽獨。曾教日日報平安。繞闌粉籜成蒼雪。不覺春光過牡丹。

贈史子慎

吳興郡守須人英。山開罨畫毛骨清。道場天目萬峯碧。響水苕溪雙眼明。鈞艇不驚鷗鳥睡。蓮歌那避使君行。西湖便訪林逋宅。竹外寒梅瘦影橫。

過賈島墓

泪盡窮轅得舊京。旋披叢灌拜先生。桐鄉遠在今西蜀。梓里遙鄰舊北平。奔走髒消何位業。推敲骨瘦是詩名。太行秋色桑乾水。野老相呼後世情。

落花

薄晚芳菲盡。崇朝錦幃空。墮紅無一語。應是怨春風。

衰草

淺白輕黃逐望迷。遠拖秋影上平堤。王孫尙作天涯客。不待春來亦慘悽。

正月十七日

燒燈已過春寒減。巢燕未歸花信遲。一曲竹枝清瘦盡。小窗紅雪看梅時。  
琵琶

墨黑香雲驪不收。并刀秋水翦橫眸。春葱浙瀝檀槽淺。亂點銀冰下急流。

石橋村清泉寺

綠遍汀洲水遶村。碧波橫印小橋痕。春流到處生芳草。江北江南人斷魂。

齊之鸞十首

之鸞字瑞卿。桐城人。正德辛未進士。改庶吉士。授刑科給事中。改吏科。謫崇德縣丞。歷長興知縣。遷南刑部郎中。出爲陝西僉事。歷河南。山東副使。擢河南按察使。有蓉川集七卷。

盛明百家詩。蓉川齊公。早負詩名。發爲詩歌。皆切民瘼。國猷筆力遒健。曲盡事情。

靜志居詩話。蓉川入夏諸詩。山川險隘。誦之有如聚米。與尹僉事耕竝工。惜乎志邊關者未之採錄也。

田按。蓉川詩有蹶張之力。超距之勇。不屑屑於詩流派別。而句奇語重。可與當時名家各分一席。

宣和堡渡河

春漲河初急。孤軍待曉天。健兒工使馬。修岸怯迴船。革泛傳驕虜。魚喙亂巨川。莫憑衣帶水。千古塹腥羶。

入中衛城

右臂伸西極，甯靈近勢聯。沙山橫絕塞，河水上腴田。草木江南色，旃裘嶺外煙。壯心驅倦足，乘郭思翩翩。

三山暫駐

金陵望何極，此地亦三山。苦水愁胡騎，高峯倚漢關。兔深青草窟，蛙急黑泥灣。土屋無完堵，饑人未盡還。

遊獻花巖

過雨初憑竹樹涼，巖居盡以北爲陽。天開斗分山迴拱，江束關形海混茫。星裏小槎浮露電，松間清梵引笙簧。勝遊無那芒鞋劇，欲問仙人借鳳凰。

張茅坐雨

魃虐蝗妖氣塞空，直從霍汝到秦東。霑衣晚坐千山雨，岸幘秋襟萬里風。黍穀大稜成野哭，豆蕎小穫覲神功。憂時未遣持杯興，白鳥翻飛谷樹中。

章州月夜望螺山有作

缺月秋山顯氣高，霜清衆斂翠作濤。溪通澗谷方逢水，地近鹽硝半不毛。胡馬幾年空野屋，王宮萬木俯荒壕。何當聽續韓公策，歲省千車轉運勞。

過安定堡不入

塞上塵勞久自便，追風驪褭錦鞍韉。防秋鼓角孤城裏，轉粟車箱大道邊。沙磧蓬蒿青帟套，鹽池潦水碧

生煙午陰絺綌增寒吹似比甯靈倍颯然。

同姚拙菴憲長張心齋副使盧藍山僉事遊小雁塔

南山秋氣翠巒岒。野思淒淒碧殿寒。塔隱佛燈無雁宿。樹如僧臘有龍蟠。霓旌古苑悲金盃。霜節清樽洗玉盤。十里曲江遊興盡。夕陽風雨幾歸鞍。

牛頭山寺

羣山四合鍵青銅。約束河流萬古東。天護漢槎迴鷺嶺。地無胡馬飲龍宮。飯僧歲稔陽坡粟。吹客秋高瀚海風。搔首沈寥呼謝朓。靈奇屬最月明中。

始皇墓

金泉已錮鮑魚枯。四海驪山夜送徒。牧火燎原機械盡。祖龍空作萬年圖。

李濂二十六首

濂字川父。祥符人。正德甲戌進士。授沔陽知州。遷甯波同知。擢山西按察僉事。有嵩渚集一百卷。四庫總目嵩渚集濂所自訂。皆於七子之外。自爲一格。大抵筆鋒踔厲。泉湧颯馳。而裁翦尙疏。不免才多之患。濂跋石琚熊峯集。謂詩文傳世。豈貴於多。其說良是。而自定己作。乃不能盡翦榛楛。信乎割愛之難也。

田按。川父作理情賦。左舜齊持以示李獻吉。獻吉大驚。訪之吹臺。王子衡少石子歌云。大梁翩翩李川父。薛君采梁園歌云。大梁李侯才絕妙。司馬鄒生爾同調。其爲名輩推譽如此。余檢嵩渚集。大約近體勝於古體。七言勝於五言。川父尤留心鄉邦故



實所著汴京遺蹟志二十四卷。博綜典洽。幾與長安志、雍錄抗行。又撰祥符鄉賢傳八卷、祥符文獻志十七卷。著述繁富。不僅以詩歌擅名已也。

楓林晚照

蕭蕭楓樹林。極目水煙積。斜陽池口明。照此霜華赤。佳景不負君。一尊秋浦夕。

夜雨

向夕雨不歇。一室生蕭爽。砌寒絡緯噉。院靜芭蕉響。壺酒度深更。齋燈照虛幌。兀坐已忘言。翛然息諸想。

讀孟浩然詩

落魄襄陽客。清芬不可攀。秋風漢江水。斜日鹿門山。野寺漫留詠。松林恆閉關。底須凌鮑謝。佳句滿人間。

邯鄲懷古

邯鄲佳麗地。傳是趙王宮。廢苑春陰裏。孤城返照中。叢臺還似昔。漳水自流東。野眺悲無盡。棠花黯淡紅。

剡中雜興二首

夜雨過漁溪。春風入會稽。雪舟人不見。腸斷剡雲西。古廟凌霄發。深山戴勝啼。多慚許玄度。恆在石城栖。

緯縹傳斯境。東南名勝州。水迴車騎宅。花遶右軍樓。樵下晚峯碧。鳥鳴春寺幽。何當解簪紱。卜築剡溪頭。

擬唐人送宮人入道二首

苦憶僊人萼綠華。乞身遙入太清家。向來寫恨餘紅葉。此去行蹤有碧霞。學道晚依新藥竈。洗妝朝棄舊菱花。玉笙不作昭陽調。縹嶺閒吹月影斜。

蚤承丹詔入華清。卻戴黃冠出漢京。籥譜好傳秦弄玉。練師初拜許飛瓊。衣沾別島朝霞色。夢斷長門夜雨聲。十二層樓何處所。芙蓉花外是仙城。

冬日出南薰門赴吳家屯別業偶值起風悵然作

晨興獨往城南村。沙風野霧寒天昏。小車驀過大堤曲。白酒初熟吳家屯。弋鴻獵兔暫爲樂。故苑遺宮今幾存。不見古時信陵墓。朔雲滿地蒿藜繁。

梁王臺

梁王臺下春草生。梁王臺上春霞明。兔園積雪有詞賦。鳧渚廢榭無歌笙。百花雙燕且對飲。碧海黃塵空復情。落日爲誰吟思苦。千秋城闕暮雲平。

僊女臺在沔陽石湖村

僊女瑤宮俯石湖。湖光瀲灩勝蓬壺。春風絳節還升降。夜月明珠定有無。流水舊迷秦洞古。片雲偏傍楚雲孤。知從南岳夫人去。何日東還海上臯。

百門卽事

百門山前花裊裊。三僊洞口雲悠悠。高車駟馬我何意。翠壁丹崖誰共遊。幾家蘿竹背巖郭。滿眼煙霞明石樓。自憐衰朽興不減。春日行歌泉水頭。

戊寅元日

簌簌春盤薦蓼芽。盈盈杯酒勸椒花。青幡綵勝聊時俗。雪郡江關自歲華。萬事傷心愁對酒。三年作宦苦思家。雲霄未上王喬履。服食空懷葛令砂。

沔陽上巳

三月上日何處遊。錦韉白馬河之洲。忽驚風打楝花盡。苦恨春隨江水流。翩翩拾翠北村女。雙雙喚雨東林鳩。蘭亭勝事久寥落。碧草池塘聊唱酬。

春日谷園賞梅

谷園梅花春可憐。欲開未開香滿筵。隔城祇愁西日墮。倚檻轉惱東風顛。攀條嗅蕊忍令折。短句深盃能爾妍。衆賓醉歸主人臥。暝鳥嘯合村墟煙。

澤州分司見竹

自別南州見爾稀。行臺駐馬暫相依。情知水石生秋思。肯放細塵點客衣。深院度颿鳴瑟瑟。短牆留月靜輝輝。家山亦有篔簹宅。十畝清陰待我歸。

汴州懷古

花石今何在。孤城涕淚中。金梁橋上月。偏照宋遺宮。

夷門

俠骨已成塵。夷門草自春。斜陽騎馬過。獨憶抱關人。

過金陵寄徐駕部

烏啼板橋浦。露落歷陽樹。夜聞青山鐘。揚帆過江去。

春遊

太乙宮前柳色。天清寺口鶯啼。煖風吹面酒醒。斜日穿花路迷。

閨思

寶鴨香銷畫樓。月明初上簾鉤。今夕不知何夕。仰看織女牽牛。

登臺有感

臺邊草色苑邊雲。載酒來遊白日曛。富貴可憐成一夢。疏花冷雨信陵墳。

途中雜識

銅雀臺邊逢早春。西陵西去草如茵。蛾眉皓齒今安在。碧水黃雲愁殺人。

明州歌

鮎嶺蛟池空復春。越王宮殿已飛塵。蹋船莫唱明州曲。一闋明州愁殺人。

寄王倅玘

九華山下讀書樓。秋浦寒雲濕不流。最愛風流王別駕。白頭詩思滿滄洲。  
雲中歌送蔡成之都憲之鎮

黃河北來東勝州。桑乾水寒雲朔秋。壯士齊歌搜套曲。元戎時宴望京樓。

# 明詩紀事卷七

## 戊籤

許宗魯三十二首

宗魯字伯誠一字東侯咸甯人正德丁丑進士選庶吉士改雲南道御史歷湖廣按察僉事霸州副使太僕少卿大理少卿以僉都御史巡撫保定進副都御史巡撫遼東有少華陵下遼海歸田等集五十二卷

王維楨槐野存笥稿少華集婉麗秀俊

喬世甯邱隅集少華詩足繼唐音

藝苑卮言許伯誠詩如賈胡子作狎遊隨事揮散無論中節

列朝詩集東侯才氣宏放開府雄邊多所建置家本秦人承康王之流風罷官家居日召故人置酒賦詩時時作金元詞曲無夕不縱倡樂關中何棟西蜀楊石沒淫成俗熙朝樂事至今士大夫猶豔稱之

香祖筆記弇州卮言載李滄溟在關中過許中丞宗魯伯誠許問今天下名能詩何人滄溟曰惟元美次則宗子相許請子相詩觀之滄溟勃然曰夜來火燒卻許面赤而已余嘗嗤之夫子相詩未必能過伯誠卽索觀亦屬恆事何至怫然如此特著以爲文人相輕之戒

靜志居詩話少華諸體皆工寓和婉於悲壯之中譬之秦箏獨無四氣足與邊廷實王子衡並驅  
田按東侯固是關中之俊音亮氣邁對山漢陂皆在下風

### 渡白溝

昔運遘屯厄恆紀變參商南風日不競朔吹亦遠揚英雄各乘御龍戰血玄黃矯矯平將軍獨立當中央張弧射九日撫劍盼四方事去迹故隳志伸願已償竭來歲月久道里未能忘仲生固有爲忽死亦其常停驂覽故壘雪涕履戰場清川帶滌紆白骨浩縱橫惋歎不能發總轡歌此章

田按平將軍平安也小字保兒建文元年伐燕安爲先鋒燕王將渡白溝河安伏萬騎邀之戰最力屢挫燕師王親搏戰幾爲安樂所及已而敗被執燕軍歡呼動地爭請殺安王惜其材勇選銳卒衛送北平王卽帝位按安北平都指揮使永樂七年帝巡北京覽章奏見安名謂左右曰平保兒尙在耶安聞之自殺東侯此詩感慨激昂仲生固有爲忽死亦其常二句蓋爲安惜之也

### 寒夜懷皇甫世庸

夜色寒以肅北風振高枝況有南飛鴻嘹唳雲間悲思君隔煙水還望情無涯豈無琴尊歡而與誰共之耿耿不能寐起見星河垂願言拾瑤草順風能遠賒

### 宿渡口寺

朝行辭蔚蘿暝宿寄禪室乍屏車馬喧頗遂山林癖閉門謝囂閨宴坐同隱逸雨洗蓮界青月照松關白

夜榻秋聲遠。海鏡定光碧。道心難遽探。俗慮暫可滌。匪曰參上乘。聊以寄空寂。

亭上

羣動暮已息。吾亦與時休。暫去簿書勞。薄言懷夕遊。透池步畦徑。逍遙卽林邱。涼風洒檐樹。亭影漾池流。澄神對止水。沖慮復何求。尊中有素醪。獨酌還自酬。心遠境亦寂。何必於滄洲。

答惟喬夜集

檐雨罷宵響。海月升東楹。杪秋氣高肅。臺館滋虛清。長歌命深酌。豪談對友生。眷眷一夕歡。悠悠千載情。春日登含元殿故址作

覽故躡崇基。披荒撫遺跡。川原諒如斯。壯麗感非昔。五城隱見分。雙闕峩峩立。參差想華構。凌厲餘層級。卻繞涇渭明。俯視終南屹。落日黯將暮。春草萋以碧。嗟哉市朝變。去矣雄圖熄。黍離有餘悲。桑海詎終極。八月十三夜開福精舍對月

靈境自虛寂。秋期倍森爽。西風洒樓閣。鐘梵虛空響。浮雲薄暮盡。華月東溟上。光明麗中天。羣昧倏以朗。對此悟圓照。因之釋衆想。況有素心人。相將共幽賞。

期遊蒙谿菴過歸不果途中賦述寄遺道侶

邃壑啓神窟。延阜羅仙源。富有山水勝。獨謝塵土喧。芒田蒔大藥。洞府弭華軒。玉桃千載實。珠樹四時蕃。



沖想寄靈囿。遐矚阻玄門。愴往齒髮變。期來歲月奔。纏綿未能解。飛舉詎堪言。因書達羽客。聊以展寒溫。

暮春同諸子登望江樓作

曩宦闕茲遊。今來遘斯賞。朱閣凌漢飛。丹磴綠雲上。芳時豔桃柳。春渚茁菰蔣。浩浩江水修。茫茫楚封廣。惠風拂綺楹。淑氣耀金榜。波光蕩空洞。石霞映虛敞。層觀每興矚。萬籟各奏響。沖騫信有基。大造窺無象。暫喜辭喧卑。同懷納高爽。寄言御風軒。兼以出塵網。

秋日過相國熊峯先生故居

坼台願已違。奠楹兆何速。山立鞏不搖。川逝迴難復。生申靈氣闕。化宿餘精鬱。烈往寵獨延。代遙譽恆馥。膺門儼若存。拭履愴彌篤。翟羅張已久。容閭式誰續。時態傷雨雲。義感填陵谷。

留城懷古

哲士昔未達。龍伏於草萊。翻然奮鱗翼。出際風雲期。手握黃石符。身爲赤帝師。智運祕神鬼。蕭韓那得知。四海歸皇圖。英雄多見疑。開國重始遇。乞留有餘機。河山奄舊疆。珪組紛陸離。履滿戒知止。居崇慮蹈危。避穀假高蹤。赤松杳何之。冥冥九霄上。飛鴻振羽儀。寄謝工弋者。懸情一何爲。此意商巖叟。庶幾達其微。

送葛穉方赴河西幕

君乃上谷才。遠赴河西幕。山中忽相見。故舊情如昨。神駿本爲龍。屈蟄今成蠖。驍騰千里駕。且困鹽車縛。

遙聞主將賢。愛客時開閣。相逢一二語。卽訂平生諾。日飲葡萄酒。春醉舞蓮花。醵歡言魚水。契不道殊方惡。秋城與爾別。霜葉繽紛落。丈夫輕遠遊。爲賦從軍樂。

秋日曲江同韋西諸君子遊燕

柴門曲江畔。榆柳晝陰陰。入竹尋幽徑。開窗得遠岑。野蔬童旋摘。村酒客同斟。坐聽涼蟬響。蕭蕭秋滿林。三月三日遊含元殿

登毘盧閣

芳辰臨上巳。廢殿訪前朝。地古佳名在。時移王氣消。河山看表裏。觀闕想岩嶠。春草興亡恨。行歌麥秀謠。香閣標靈勝。丹梯覽壯模。人天開化國。海岳衛皇都。結蓋蓮雲涌。懸珠寶月孤。飄飄辭世網。萬有盡空無。

野酌

野酌傾崖密。山羞薦渚蘭。藉雲衣袂溼。浮翠酒杯寒。醉舞攜玄鶴。仙謠奏紫鸞。臨風思羽翰。長嘯振岩巒。石鐘寺

歌風臺

抱郭雲林麗。懸巖樓觀虛。窗光挹彭蠡。簷翠下匡廬。霜吼鯨音石。風翻貝葉書。煙波五湖上。到此憶高居。亂水疑無地。荒城但有臺。風煙沈王氣。歌詠想雄才。世遠川原變。秋深草木哀。登臨招猛士。芒碭暮雲來。

別館奉餞劉士奇參政湖南

花明翡翠館。酒灑鳳凰卮。楚塞動行色。秦箏起別思。雲疑神女夢。竹想帝妃辭。倘著南遊賦。因風一寄之。

邊事三首

九天行殿丹青麗。列鎮雄兵虎豹屯。上谷將軍新賜姓。晉陽妃子獨承恩。錦屏歌吹天顏喜。玉帳森嚴將令尊。流水浮雲俱過眼。傷心甲第鎖千門。

朵顏三衛海西頭。保定河間種類稠。千里營屯成拱衛。百年禮樂化旃裘。虛傳江統能高論。須信文皇有遠謀。古北黃花俱肘腋。瞻天誰抱杞人憂。

眉山司馬萬人豪。曾築長城心計勞。坐使匈奴無右臂。笑談邊鄙失腥臊。黃雲北去龍沙迴。黑水東來雉堞高。衛霍不須論戰伐。萬年基業本蕭曹。

望洪光寺

香臺隱隱蔽層峯。曲磴盤盤轉萬松。縹緲煙中祇樹色。稀微花外上方鐘。光搖涌殿琉璃淨。路入雙林翡翠重。渡海何年心自許。梯雲此日恨無從。

功德寺

功德寺前湖杏冥。渚花汀草流芳馨。法堂雲深殷仙梵。塔院晝寂喧風鈴。野煙空濛石閣邃。春水蕩漾蓮

臺青。開門秀色淨如洗。落日西山虛翠屏。

九日同劉司徒慈恩寺登高得嚴字

積雨初晴爽氣嚴。南山空翠落虛檐。登高尙覺秋懷壯。抱病深嗟酒興廉。白社有緣逢惠遠。黃花如約遲陶潛。爲耽佳節忘歸暮。風帽欹斜醉不嫌。

寄馮伯房御史

夏口別君今廿年。地偏書札迴難傳。遙聞御史如桓典。且喜諸生有鄭玄。老去交情懸楚澤。秋來離思滿江天。雨花臺上登臨處。寄我雲霞賦幾篇。

立春夜燕師徵君宅醉中作

西京豪士青春燕。南國佳人白雪歌。醉裏不知身老大。歡來那問夜如何。纏頭錦段無勞惜。到手金尊豈覺多。白髮紅粧笑相向。良宵爲樂肯蹉跎。

正月十四日汧邸燈燕遇雪

長安霏雪滿山川。帝子張燈令節前。六出花明流夜月。九枝光煖結春煙。仙倡玉樹調新曲。上客瑤華擬鉅篇。十載王門枚叔老。強將衰白侍賓筵。

春日遊興慶故池

昔是皇家苑。今爲藩國池。景龍餘舊號。花萼尙殘碑。風館榛蕪合。龍舟歲月移。藤垂千尺蔓。樹拱萬年枝。芳草王孫賦。霓裳帝子辭。翠盤懷妙舞。玉笛想橫吹。佳麗前朝迹。興亡異代時。乘春聊命賞。覽古一興思。海變旋成陸。臺傾已就夷。援琴歌慷慨。徒感雍門悲。

題畫

草閣生晝涼。南風滌炎暑。幽人坐忘言。靜聽泉石語。

送別吳醫馮元理

採藥吳中久。匿名偶騎山。虎下山行。還丹賣畢。還山去。人說都門有宋清。

茗溪歌

沙際交飛雙燕子。池頭並宿兩鴛鴦。採蓮人自愁相見。況遇青衫白馬郎。

黃佐三十一首

佐字才伯。香山人。正德辛巳進士。選庶吉士。授編修。出爲江西按察僉事。改廣西提學僉事。致仕歸。起左春坊左司諫。遷侍讀。掌南院事。再遷左諭德。歷南祭酒。進少詹事。兼侍讀學士。贈禮部侍郎。諡文裕。有泰泉集六十卷。

四庫總目。佐詩吐屬冲和。頗見研練。於時茶陵之炤將燬。北地之鋒方銳。獨能力存古格。可謂不失雅音。

藝苑卮言。黃才伯詩。如紫瑛石大似棘輪。才伯亦有佳語。如青山知我吏情澹。明月照人歸夢長。長空贈我以明月。海內知心惟酒杯。門前馬躡簫鼓動。柵上雞啼天地開。

湧幢小品。夏貴溪妾蘇。唐陵人。其父曰綱。少女適曾石塘銑。與貴溪爲聯衿。綱出入兩家。傳石塘復套之說。夏大喜。主其策。綱益自負。與巡倉御史艾朴通賄作奸。爲衆所嫉。分宜已一一刺其陰事。伏毒深。夏不悟。妄度河套。指日可復。得意甚。作漁家傲一闋。適黃泰泉至。掀髯示之。索和。黃有千金不買陳平計之句。蓋諷之也。夏大詬詈。嗾言者逐之去。去三日而禍作。

國雅。黃詹事才伯性尚沖和。韻含芳潤。玄覽繁洲。藏珍瓊海。爲一代名家。其詩譬之龍躍懸河。鳳鳴阿閣。輝映高絕。

廣東新語。歐貞伯云。泰泉先生。嘯出南海。持漢家三尺。以號令魏晉六朝。而指揮開元。大歷。變椎結爲章甫。闢荒穢於炎微。功不在陸賈。終軍下。

列朝詩選。才伯髻髻以奇雋名。及入翰苑。博綜今古。修詞採藻。爭雄藝苑。嶺南人在詞垣者。瓊臺。香山。後先相望。後來梁公實。黎惟敬皆出才伯門下。南越文學。彬彬然比於中土矣。才伯有漫興詩。落句云。倦遊卻憶少年事。笑擁如花歌落梅。自注云。欲盡理還之喻。王元美云。此公作美官講學。恐人得而持之故也。今刻泰泉集不入此注。故附記之。

明詩選。陳臥子曰。才伯亦窺見格律。

靜志居詩話。文裕撰體頗正。而取材太陳。故格雖聳高。而氣少奔逸。

田按。才伯論詩云。吾見近世古詩以綺靡爲精工。律詩以粗豪爲氣格。然則徐庾之玉臺。優於蘇李之河梁。蘇頌之輕花捧觴。岑參之柳拂旗露。反不如羅隱之天地同力。章莊之萬古坤靈矣。持論甚精。泰泉集古體微傷堆砌。律體與七言斷句。極得唐人格意。

### 都門逢美人行姚倅奎席上賦送陳參政探韻得高舉二字

都門柳絲青可纜。閒關好鳥求其曹。美人久矣入夢寐。笑揮結綠歌鳴皋。憶昔贈我金錯刀。欲往報之阻煙濤。雲裾月珮忽相見。冰雪一洗心煩勞。兔園開尊延旆旄。春風淡蕩吹緋桃。觥籌凌亂絲竹動。燕笑不知明月高。泉陵別駕醉起舞。舞罷逡巡淚如雨。感恩自是門下人。殺身未報尊前主。當年人棄君獨取。英雄未遇多齟齬。劍埋楚國終作龍。璞售宋人何異鼠。君不見毛公。薛公誰當語。風雨感會生毛羽。平原之客徒豪舉。

暮春郊外

五日逢休沐。千山得勝遊。樓臺蕭寺迴。花竹習池幽。春事已黃蜨。舊盟惟白鷗。煙塵奔走地。回首意悠悠。

次韻贈張子

長安木葉下。蕭蕭生客愁。夜寒空對酒。雲淡獨登樓。柳岸橫長笛。花灘放小舟。向來江海意。淒斷爲清秋。

秋日遊迎祥寺至玉泉分韻

迢遞尋蓮宇。淹留詠桂枝。玉驄穿柳入。錦席傍泉移。山翠浮龍苑。雲光溢雁池。塵心今已淨。應有白鷗知。

贈別韋評事歸靖江

抗疏甘南謫。知君不負丞。離情江上樹。聚首驛前燈。幽谷歌鳴鳥。天池息大鵬。扁舟汎明月。回首夢毘陵。

控海樓有懷徐可大

南州徐孺子。落筆滿人間。江上笑爲別。天邊去不還。高樓題控海。此日獨看山。尙憶危言日。投簪且閉關。粵臺懷古

勝地經秦漢。高臺近斗牛。片雲浮鬱水。孤月滿靈洲。事往市朝變。秋來林壑幽。霸圖何足問。吾得采真遊。草堂夜坐

浪迹少城隈。衡茅向水開。閉門青嶂合。卷幔白鷗來。地僻清虛洞。天高玄覽臺。坐聞松籟起。竟夕思悠哉。全節廟

極目煙塵暗。帝畿樓船南。去逐斜暉。已無虎帳鳴金柝。祇有龍潭葬寶衣。精衛何時填海滿。蒼梧終日見雲飛。貞魂若化吳宮燕。應是年年一度歸。

桂江秋懷借養齋方伯韻奉寄

桂江水高三尺強。秋來鴻雁相回翔。鳴榔捩柁亦何意。楓葉蘆花俱可傷。蒼梧望斷粵雲白。滄浪歌罷湘煙長。會須萬里去寥廓。嗟爾尉羅空自張。

羅浮青霞谷贈甘泉

青霞谷中飄紫煙。誰其栖者甘泉仙。雲邊放鶴啄瑤草。雨後呼龍耕玉田。梅花不作翠羽夢。薤葉細寫朱雲篇。沖虛昨雨自高枕。曉來同話羲皇年。



補送孫學士之留都

景陽鐘動散宮鴉。南院新承北闕麻。潞渚夢回燕樹月。玉京吟對蔣陵花。山分龍虎曾開國。江足鱸魚莫念家。誰道桂坊成久別。佇看鳴珮入承華。

彭城懷古

華髮蕭蕭羈旅情。片帆衝雨過彭城。黃樓此日河聲急。赤帝當年劍氣橫。魏闕自生千里草。長陵誰薦一杯羹。歌風臺下休回首。惟有寒潮訴不平。

聞雁

瀟湘水碧莓苔青。白雁掠雲時一聲。疏燈古壁照蓬鬢。江湖心事秋冥冥。

匡山懷古

兩厓形勝自天開。奪港猶思卷土來。千古海陵遺跡在。雲濤回望重堪哀。

讀見素救李空同奏疏偶成

賈誼憂時舊有名。楚騷何事不勝情。長安宿鷺衝人起。應是風波到處生。

潞河阻凍戲贈文衡山

闔閭城下浩煙波。日日沙頭載酒過。垂楊繫艇不知數。一紙黃庭雙白鵝。

南歸途中

南旺湖邊沙柳春。鵝黃鳧藻相鮮新。棹歌歌遍江南曲。嫋嫋輕風吹白蘋。

西清詞三首

璧月珠星滿紫壇。蓮花齊簇切雲冠。瑤池豈必傳青鳥。蓬島惟應集絳鸞。  
碧殿崢嶸概泰清。颿臺時送步虛聲。流鈴擲火飛章地。一片雲遮翡翠城。  
減卻雲鬢帶玉冠。紫煙衣薄露光寒。步虛聲裏琪花落。贏得君王轉盼看。

張時徹二十六首

時徹字唯靜。鄞人。嘉靖癸未進士。授南兵部主事。改禮部。歷員外郎中。出爲江西提學副使。歷福建參政。雲南按察使。山東。河南布政使。以僉都御史巡撫四川。改江西。入爲南刑部侍郎。改兵部。進尙書。有芝園定集五十卷。

明詩選陳臥子曰。司馬樂府頗有造構。近體宛倩麗逸。如層臺佚女。意帶雲霞。

列朝詩集尙書詩學殖富有。工力深重。樂府古詩。標舉與會。時多創獲。七言今體。塵空蕪穢。若出兩手。楊用修評其詩云。四言以至六言。冲澹穠粹。沈鬱雄壯。匠意鑄詞。色具體備。七言之什。自鄼無譏。用修可謂能言矣。

甬上耆舊集尙書歸老時尙茂齒。精思著撰。爲詩古文詞。及他說林家言。凡數十卷。輯洪建以來大家名文爲文範。別爲文苑。撰郡誌。續四明風雅。旣以標格自持。益好士。寵薦後輩。凡經其門。後俱爲名士大夫。所執友。義重死生。始爲進士時。有騎馬來。

定交者曰王徽子揚。快士也。子楊死。爲刻鶴山集。豐人翁以落魄死。爲刻考功集。陳后岡早歿。既刻其集。復爲勒石墓門。家有別墅在東皋。曰茂嶼。草堂在西皋。曰武陵莊。時引上客。觴詠其間。卽單門年少。一經品目。藉以揚聲。吾鄉士大夫壇壝。於斯極盛矣。

靜志居詩話。芝園樂府不規摹古人。較之濟南覺勝。五律頗近初唐。

田按。芝園詩自以樂府爲勝。駢文亦是當家。所作豐考功集序。情文俱美。視貌襲秦漢者。不可以道里計。

豔歌何嘗行五解

天有七曜。地有四維。天有七曜。不照汝情。地有四維。不能制汝遊行。解一結髮爲婚媾。琴瑟兩相和。汝今但遠去。信誓齊山河。解二池中有鴛鴦。箇箇兩相當。樹上有女蘿。葉葉自交柯。解三食蓼不言苦。食鬱不言甘。心思所親人。過期而不詹。解四醯雞處餅盞。蠹蟲食桃李。不得同生。亦得同死。解五

子夜歌二首

乍來結女伴。江頭去浣紗。問訊郎消息。夜來燈燭花。  
女郎宛轉歌。輕舟棹碧波。打動明珠碎。團團落菱荷。

古別離

春思已無那。如何又早秋。偏將一片葉。飛作萬重愁。鳳枕蘭香細。瑤階霜杵柔。暗揮雙淚眼。一望大刀頭。  
有所思

清鏡久不御。朱鉛那復施。忍看雲並雁。愁見月穿帷。華燈冷紅豔。庭草委芳蕤。不及梁間燕。雙雙啄紫泥。

戰城南

朝戰城南。暮戰城北。矢若飄飛。戟如蟬積。晨起裹創。血淚沾臆。營中振鈴。帳下蓐食。城南舉火。城北揚旗。將軍如虎。偏裨如熊。衝堅陷瑕。什攻五圍。血流野草。肉挂枯枝。我聞有道。四海寢戈。桑乾草青。條支不波。北款呼韓。南制尉佗。魚麗雲屯。被甲則那。

關山月

東海冰輪出。西川桂影多。弓開玄菟郡。鏡轉白狼河。亂角驚城鵲。清霜照鐵戈。胡塵猶未滅。戍客奈愁何。

江南曲四首

儂住大江南。君家大江北。生長不相知。江頭見顏色。月白鸞簫細。江清龍笛鳴。長千里中兒。打鼓賽江靈。捕魚橫塘濱。舶多不施罟。南風忽來吹。移舟向前浦。東涯芳杜綠。西渚蓮花紅。瓊英若可贈。徒棹及秋風。

嬋娟曲

繆承金屋寵。轉爲玉顏傷。妾意有何極。君恩自不常。朝朝占鳳輦。夜夜夢朝陽。不惜千金賦。能蒙一盼光。

寶刀吟

幽并遊狹兒。百寶裝吳鉤。處囊時電掣。出匣有星流。空抱屠龍技。未逢推轂收。何當承尺檄。一爲掃旄頭。

青山歌贈蕭封君

青山兮嵯峨。綠水兮層波。朱鳥兮上下。玉樹兮交柯。山有人兮考槃。殮玉屑兮弄潺湲。荷衣兮籜冠。紉之兮紫蘭。彼簪紱兮何有。徒忍尤兮抑首。睠鳳羽兮高飛。焚樹蕙兮盈畝。歸來兮山中。駕白鶴兮驂龍。丹邱兮羽人。聊與子兮從容。

君房下第歸

在在有芳草。處處有青山。君去與之去。君還與之還。燕臺空駿骨。漢宮擯朱顏。自古有如此。沈冥且閉關。

離別詩

朝飧共盤匱。夕夢貼衾帷。肝膽自相照。山河誓不違。脂車臨遠道。啟匣出裳衣。甯知寸心斷。還言千里歸。

送林民服歸省

大夫懸紫旆。相送出江東。那忍仙舟去。猶憐尊酒同。山青建業雨。雲白武夷宮。繡服承歡處。芳蘭滿故叢。

龍隱潭

磴險愁窺壑。巖開始見天。衣裳牽宿霧。石罅瀉鳴泉。四壁松蘿古。孤峯日月偏。雲雷時不歇。知有白龍眠。

邵武道中

明發衝寒露。征旄載曉星。水穿雲竇白。天掩石門青。鳥雀爭陽谷。松巒間短亭。所嗟筋力薄。奔走未遑甯。

大王峯次中溪韻

不有風流客。那知太上峯。盤雲出鳥背。拂石禮仙容。鍾乳流丹壁。巖花開紫茸。夷猶終永日。昏黑尙捫松。

自清泉至衛源舟中作

飛鳧將畫舫。只傍片雲行。本以風波客。因舒覽眺情。煙凝村店近。月上野鐘鳴。一曲陽春調。停琴待友生。

新秋詠懷時在病

芳杜秋風冷。蘭舟剡水遲。美人在何許。遠道本難期。皓月臨瓊樹。青樓出鳳吹。曲中有深怨。不奈妬蛾眉。

訊東田閉關不出

入林何太密。閉戶但窮玄。流水在屋外。青山落枕邊。藥從三島得。方自上池傳。勅斷人間世。逍遙一睡仙。

春日遊茂嶼山莊同諸彥作

蘭舟一出郭。步步可憐春。沙草不禁綠。谿花亦自新。煙霞青竹杖。湖海白綸巾。總爲疏狂甚。豪吟不避人。

雨望

高樓不可上。一上添愁。落葉亂山暮。滄江凍雨秋。洩雲寒抱樹。決水曲通洲。白髮何爲者。空餘一劍留。

十四至茂嶼山莊

一自逃空谷。長爲山水雄。每逢青眼客。來伴白頭翁。煮茗燒松葉。酌泉引澗虹。瑤臺高不極。徙倚睇秋空。

專

